


# ONAMOONA MPHAREYA

 Nihinatthi wuurama miru sahu wira nivekele, kaatthuna kisome vakhani Masu a Muluku. Miyo kweekwe okisivela osoma Masu Awe; okhala wira moolumo aka anoovonya, t'a mutthu, masi Masu Awe khanvonyeya. Nto nyuwo munkhala muttharaka yoosoma, ni sikina, nrowe nimusome Matewu kapiitulu 14, ohiy'ula, opacerya versiikulu 22.

*Numala Yesu aahaaruma awiixutti awe okela mukalawani, wira ahooleke olapuwela okhopela wa nratta, okhala wira owo aahala aamwaryaka atthu.*

*Vaamwanryawe muttithi owo w'atthu, aahiwela vamwaako wiphiini wira avekele: nto okathi... vaahiila, nlelo ori weiwo meekh'awe.*

*Nave ekalawa vano yaari eriyari yephareya, emaniwaka ni mawimpi: okhala wira epheyo yaari yoovirikana.*

*Vahalaka oxa Yesu aahaarowela, eettaka vasulu vaphareya.*

*Nto awiixutti vamoonaljaya eettaka vasulu vaphareya, awo yaahituthuwa, khwiira, Ole munepa; enakhuwela yoovaka.*

*Nto Yesu aahaakuwa waalavuliha, ahimyaka wira, Mukurunuxe murima; ti Miyo; muhoove.*

<sup>2</sup> Nuurame miru sahu vano wira nivekele. Miru sahu ni mirima sahu siry'ene soowuurama ohoolo wa Muluku, yookhala yooththuna mpaani mu, ohiy'ula, mwaatthun'anyu omusuweliha Muluku, nvenxaka matat'anyu, wira muupuweliwe mmavekeloni? Apwiya yooweheni, ekhale oonimorela ikharari.

<sup>3</sup> Tith'ihu a Wirimu, hiyo ninoorwa vano Ohoolo Wanyu, mwa ephiro ni Nsina na Pwiya Yesu. Nisuwelaka wira, ni nrromelo wooreerhiwa, Owo onilaihenry'awe, wira hiyo "navekelaru etthu p'itthu" mwa Nsina Nawe, Nyuwo mwaamunivaha. Hiyo khaninreere oxukhuru mwaha wa yeela. Moolumo khakhanle ohimya enamuna sinoon'ahu mwaha wa yeeyo, ni nrromelo nirin'ahu, wira Nyuwo munniniiwa vano.

<sup>4</sup> Nyuwo muhoona matat'awo, Pwiya. Nyuwo munnisuwela etthu awo yaaphavel'aya. Nyuwo mwa oosuwela sothene, Muluku oowerya sothene, oohimala, ni hiyo noosuwela wira Nyuwo munnisuwela mirima s'atthu. Nyuwo mwaahisuwela miyuupuwelo sahu. Hata nihinatthi opattuxiwa, Nyuwo mwaahisuwela khula muupuwelo naarow'ahu okhalakhala nikhalanaka, okhala wira Nyuwo mwa oohimala.

<sup>5</sup> Nto hiyo ninvekela, Pwiya, okathi ula, okathi sootthuna sahu sinoophwanyaayani Nyuwo, nwehe vathi okhuma Wirimu, Pwiya, ni mukuxe soovekela sahu vamurimani Vanyu Yeenyu, Pwiya, ni munaakhule muttharihaka mihakhu Sanyu Moovuwani. Munivahe sinthuna murim'ahu, nroromelaka wira p'utthuna Wanyu w'eMuluku. Ni noosuwela wira ti osiveliwa Wanyu wooreera wira otthuna Wanyu.

<sup>6</sup> Munivahe-tho omwaraxiwa wuulupale wa Mukhalelo Anyu, ohiy'ula, Pwiya. Mwaavonihe aretta. Nwoopole ale arimenle, mwaavenxe ale akhwiye mutampini ni soottheka, ni mwaaruhe mw'Ekumini ya naanaano, ohiy'ula. Wira nimoone Yesu. Hiyo ninvekela mwa Nsina Nawe. Amen.

<sup>7</sup> Mukilaathiki. Nileveleliwe mwaha w'ohiweryaka waavaha opuro atthu, mwaha w'ohikhala opuro. Masi, okhuma ohiyu woopacerya, enihimmwa wira yaahaana omwariwa mittitthi suulupale s'atthu, tivo nileveleliwe mwaha wa yeeyo. Ni Munna Grant khowenrye oteka esaala ekina, nave, wira... Kookupali wira ti moonoo woolopwana owo onrow'awe osuseriha ekapatti ila. Munna, oophenteya oophenteya ookikoha olelo sinto kaamukhalaha yeela etthu ya khula mwaakha, otthikela oDallas, okereja wawe. Olattuliwa wuulupale ntoko owo, okathi ula, mikhora sinaakuv'aya owaleya, vano nto mulopwan'owo onthuna wira kitthike ni kikhalihe etthu ya khula mwaakha, yookhumelela. Miyoo ennikisivela yeeyo.

<sup>8</sup> Kaahikhalana okathi w'opatthana ni yaawo voosiis'ula, ni Munna Gordon Lindsay ni anci-ene aya. Munna Peary Green, yoowo okhanle ti mukhaliherya a muthukumano onoorwa wu oBeaumont, okilanthe ottuli waka nno ohiy'ula. Ni anci-ene, apatthan'ihu, Munna Don n'amwaar'awe. Hiyo nootteeleliwa murima okhala ni yaawo va. Apwiya yaareerihe.

<sup>9</sup> Vano, ohiy'ula, paahi... Kineehererya okhalaha Mitthaka saka sookhweyexa ntoko sinweryaney'aya, wira hata mwaana awerye wiiwa oratteene.

<sup>10</sup> Meelo oxekuwa muteko w'onamalaleya, ni kaanithuna othene nyuwo muwenry'ene orwa.

<sup>11</sup> Vano mwakhalana miteko s'okokhorela okereja wanyu, vano, mu—mukhale vaavo ni—nikhanle nipuro nanyu na muteko. Hiyo khaninthuna wira hata mutthu ahiye ekerej'awe, wira... Vano nto mwaawereiwaka munatthuna orwa wira nvekeleliwe, ni ekerej'anyu erine-ene muteko meelo oxekuwa, mulavule ni pastore anyu mwah'owo, wira owo ahuupuwele vooanara, moosuwela. Mmusuwelihe wira hiyo nri va mwa wiiwanana, wira—wira nikhaliherye Erutthu yothene ya Yesu Kristu eneetta mukwaha nno oDallas ni mapuro makina.

<sup>12</sup> Tivo, meelo oxekuwa, kinoona wira, ewoora ya neili ni minuutu miloko miraru, kinrowa olavula Mutthaka w'onamalaleya. Vano nto ninrowa waavekelela aretta othene,

okuxa ittikitti sothene sa mavekelo n'itthu sihiwe moovirani w'esumana, nivekelele sothene iyo meelo.

<sup>13</sup> Vano mwah'aka ohiy'ula ori ntoko yoothweela yaamukhaani, ya okathi vakhani paahi. Kinrowa wehererya okeliha vanci-ene ohiy'ula ntoko sinwery'aka, mwa waavekelela aretta. Yoosom'aka t'ila, "muhoove, ti Miyo," Yesu alavulaka. Mwah'aka t'ula: *Onamoona Mphareya*.

<sup>14</sup> Waahaana wira wiilale-ene makaaripi, nsuwa naahaana wira nitupwenle-ene okathi yiiraneiy'aya yeela, nto vano naahaana wira nikhhanle-ene nihiku nooviha ntoko nla va.

<sup>15</sup> Evekhulelo yohononeya, nto enooreerihwa. Tivo kirukunxaly'aka mwah'aka okhuma vate vale, etthu kaarow'aka olavula, wira kiwerye waakuviha, wira muhikilaathi moovihani siisa.

<sup>16</sup> Mutothi ula muulupale a ihopa, numala woona etthu yaakhumelenle nihiku nothene, amuwehaka Yesu muhina mwa muteko Awe muulupale.

<sup>17</sup> Waamukisivela kaakhanle nihiku nenle, wira kimutthare Yoowo. Masi, moosuwela, kinnitthapa nlelo okhalana mureerelo wo wira etthu emosaru, omuweha Owo airaka itthu. Ni ti yuulupalexaxa omuweha Owo airaka olelo ovikana saary'aya okathi ule. Kinnimwaaminixa Owo vano, ni kinniweya okhalanaxa waamini vano ovikana kaarow'aka okhalana okathi ule, okhala wira naahikhalana iyaakha ikonto piili wira yooniheriwe wira Ehapari yooreera ti yoolikana. Nto nuuvira iyaakha ikonto piili, Owo nlelo mukumii, airaka siiso ntoko siiraly'awe okathi ule, tivo hiyo nookhalana olipa vaalupale ni mulipiheryo wowaatta wa waamini vano ovikana saarin'aya okathi ule.

<sup>18</sup> Okhala wira, Owo aari Mutthu paahi eettasa ahimiyaka wira—wira aarummwe ni Muluku ni wira aari Mwaana a Muluku, ni wira Muluku aanilipiherya Masu Awe a nihiku nenle, mwa Yoowo, ni awo yaahikhalana etthu ya nthowa wira ehoverye. Mateoloko, yaari yaawo! Nto nkawehani wira yaari etthu y'elolo, vekeekhai yaari y'elolo, okhala wira mateoloko ale yaahaana waamini Yeeyo vahaakhanle wira Muluku khaariipihale wiitho. Bibilia ohimnye siiso.

<sup>19</sup> Nto nyuwo mwaahisuwela wira Owo oohimya wira amwaariipiha-tho wiitho olelo, wira ehoone Yeeyo? Awo jaarowa okhala "oothipelela, oowiiisoono, oosiveliwa itthu sa vathi ohiya opatthana ni Muluku, oohaataaniheya, oowootherya akhw'aya, oohisumaaliha, awanani a atthu ooreera murima; yooneyaka ntoko atthu oothunku, nave anookhootta Owerya waya." Vekeekhai natiri onootthikela-tho. Nto ti voorika owoonela othunku atthu, ni maitho aya ary'aya ooriipiwa mahiku ala. Ni Soolempwa Muluku sihimaly'awe wira saamwiiraneya mahiku ala, okathi ula, ni hiyo ninimoona

seiyo n'uweha. Vano nto atthu anooweha, n'uttikinya muru aya n'ukhuma, wira, "Miyo nkinoona Yeeyo." Eyo etthu y'elolo, masi nnakhala vo Soolempwa sihaana omaliheriwa. Ehaana okhala siiso.

<sup>20</sup> Tivo awiixutti ala yaahithanliwa ni Muluku. Nyuwo mooweha, wira Yesu aahaaleela, "Ohinatthi opattuxiwa olumwenku," wira Owo aahaathanla, ni wira awo yaari epyo yoothommwa ni Muluku. Tivo mixankiho sakhumelela, nto atthu enakhala ntoko yaahimukuttela Yesu vanlothoni, mwa yookoha, khivaakhala hata ohoverya mwa yaawo. Awo khayaawerya osuwela saana, masi awo khayaatthuna osuwela etthu ekina oohikhala Yoowo. "Nyuwo paahi murina Masu a Ekumi." Ni awo yaatthuna okhala ni Yaawo, okhala wira awo yaahitthomeliwa muteko yoowo.

<sup>21</sup> Ni ti siiso siry'aya olelo, wira alopwana n'athiyana, atthomeliwe Ekumi Ehinimala, anoophiya mw'Ekumini Ehinimala. "Othene ale Atithi akivahaly'aya animoorwa wa Miyo." Awo Masu Awe, ni khanivonyeya. Awo—awo Masu a Muluku.

<sup>22</sup> Nto hiyo ninniwoona awiixutti ala vano, wira yaahikhalana muthukumano muulupale nihiku nenlo, vapuwani nuulupale okerekhere wa mwaako. Vano Yesu aahaahimeerya wira, "Vano nyuwo muhoolaseke ekhopela ekina y'ephareya, ohoolo Waka." Nto Owo aarowa owela vamwaako, meekh'awe, wira avekele. Nto awiixutti ala, numala waasuwela apatthani, kinniweriya otthokelela moota yoonaly'aya.

<sup>23</sup> Okhala wira, waasuwela apatthani, naanaanoru ovalaana n'apatthani; okathi ene yoowo munsuwelan'anyu, vano muhaana wira kwaherini. Nto eyo kweekwe enikhalaka yoowereiha murima wa miyo, mulaponi mothene, molumwenkuni mothene, kinnaasuwelaka apatthani naanaanoru ni waahiya, musuwelaka wira aakhala anci-ene muhinrow'anyu owoona-tho mpakha okumana ni yaawo Woolamuliwani. Eyo etthu yooriipiha murima.

<sup>24</sup> Kinniweriya otthokelela ekalawa, ni e—epantte y'ohoolo waya epuruleliwe-ene mukerekhere. Ni khino siiso aari Simoni Petru, ni miyoono suulupale ni makhata a mitika, aapurunle ekalawa khurukunxela mphareya. Ni othene aya yaattikinya matata awiirelaka kwaherini ale yaari okerekhere w'ephareya. Vano awo yaamukhuwela, "Muhokolowe-tho mmuruuhe Mwiiixuttihi wira anithotole! Ni murwe nikhalane muhakalaliho mukina; hiyo khanireere oreerihwa olelo!" Ni apatthani a naanaano ettikinyaka miyoono. Nto owo khuwela aviraka vasulu v'awiixutti akina, khino khukilaathi vakhiviru ni munn'awe, Antere, khukuxa iphontto.

<sup>25</sup> I—ikalawa okathi uwo seettihiwa n'ittheke wala iphontto awo yaapurul'aya. Vano nto khino awo yaakilaathi aili muhina

mw'ekalawa, aili mukerekhere, ni awo yaani...ahiiso aili ekhukulu emosa, kiireke, khino mapuro mathanu na mosa wala mathanu na mararu vampwehiwa iphontto. Awo yaanivura okathi mmosaru, nto siiso awo yaaniwerya olipiherya ekalawa okathi saarum'aya itheku suulupale. Vano, itheku sirumaka oratteene, awo yaaniwerya ovenxa ntthanka, ni weetta.

<sup>26</sup> Waahaana okhala oxekuwa wooviha, ntoko oweha Soolempwa okathi vakhani ehinatthi wiiraneya etthu ila, nto siiso waakhanle oxekuwa woomaaleleya, wa nsuwa, wooviha. Nsuwa naamutupweela. Nto awo, evuraka iphontto, vano nto yaanihiya ni ottikinya mooni ni waalaihwa atthu, "Ninniroromela owoonani-tho nihiku nikina," okathi yaakel'aya mphareya. Vano nsuwa naanitupweela, ni opacerya w'ohiyu, vano nto nuuvira okathi vakhani e—epiphi khukela.

<sup>27</sup> Nto khino awo yaakuxale mwentto wooreera w'o—w'ovura iphontto, ni owo muteko woolipa okathi iphontto iye suulupale soolemela simpwin'aya mphareya. Ni ohalaka okhala othene aya yaari—yaari atothi a ihopa, ni alopwana aalupale a ikuru, yaalimalenle ephareya. Nto siiso awo yaamuwehererya Yesu okela mukalawani wira aatthare, voohilekela. Vano, awo khukhuma vale, ni siiso awo yaahiyale ekalawa weetta vakhani; ntoko otthukula ekalaw'anyu, vano nto n'umumula.

<sup>28</sup> Khino mmiravo Yohani t'akhanle oopacerya olavula, 'okhala wira t'ari oomalela oyeva a nikhuru. Ni khino aari yoowo iirale, "Koopacerya okhulumuwa vakhani. Nrowe neette vakhani. Nwehererye minuutu mmosa, khanirina waakuva. Owo khanatthi orwa nlelo, tivo vanreerela owehererya vakhani ni ninoomumula vooreera."

<sup>29</sup> Nto akilanthi-ene vale uuraminhe-ene muru vakhani, khino owo aahipacerya muthukumano w'ohimya onamoona. Nto ti yeeyo kintthun'aka olavula. Siiso aakhanle yoowo avennye toko, khwira, "Axinna, hata wira atthu anihimya exeeni, ni moota xeeni mutthu onthun'awe ohaamini, miyo kookupali vano, nuuvira olelo, wira hiyo khanimmutthara namawoka. Hiyo khaninthara hat'etthu woohikhala Muluku, maana khaavo aakhanle wira etthu Owo iiraly'awe olelo 'ahikhanle wira aari Muluku. Moosuwela, okathi Owo okuxaly'awe mikatthe iye khukawanya, khwaalyiha atthu ale ikonto thanu iwe, eyo etthu yoothamaleyaxa wa miyo. Vaamuweryaneya okhala yookoha mpakha olelo," vano miyo kintthikela onamoona awe paahi ntoko naarow'ahu ohimya, "masi eyo yaahimaliha mwaha."

<sup>30</sup> Khwira, "Kinniwerya wuupuwela iyaakha sivinre. Miyo kaakhala waattamela muro Yordani. Ni kinniwerya wuupuwela, ntoko mwammiravo, moota ame aka, ooreera muYuta yaakikuxak'aya, oxekuwa, n'ukiyara ottuli waya n'ukeepesa, vaniyateni, okathi maluwa ooxeerya yaaphuw'aya mukerekhere mwa muro Yordani. Ni awo yaaniwehaka

mothakoni, weiwo atthu ahu yaaruuhiw'aya eviraka mothakoni. Yaanikitharihelaka ihantisi sa mBibiliani. Emosa wa ihantisi suulupalexa kinuupuwel'aka, aari muthiyana a oSunami ni okathi mwan'awe aakhwiw'awe, vano—vano profeta khumuhimuxa mwanamwan'ola mookhwaani. Eyo yaakhalaka ehantisi yookuxa murima.

<sup>31</sup> “Masi emosa wa ihantisi sookuxa murima, amaama yaakitharihelak'aya, awo yiiraka, 'Vano, Yohani, nyuwo mwa mmiravo mwaamukhaani paahi; masi kintthuna wira muupuwele, okathi muninnuw'anyu, wira, Yehova muulupale aahaakumiha atthu ahu weJitu, ni hiyo naavinre mothakoni mme ekhopela ekina ya muro iwe. Ni iyaakha miloko mixexe sothene, awo yaaheetta mothakoni memme, woohikhala nipuro n'ophwanya-vo ikuwo, ni hata nipuro n'olya. Nto Muluku aanimoroxa yolya okhuma wirimu, khula ohiyu, ni waalyiha atthu ahu mothakoni mme, 'okhala wira awo yaari muhina mwa muteko aya, emuttharaka Yehova muulupale. Nto vano, nihiku nimosa, Yehova onoorowa wiipaka erutthu elapo ela ya vathi, mwa mukhalelo wa Mutthu, Owo onrowa wihaniwa Ole ooreerihwa, Mesiya.’

<sup>32</sup> “Ni kinnuupuwela,” owo aamwiira, “ntoko mwammiravo, moota muupuwelo aka w'emiravo waathokelel'aya, weererya otthokelela, 'Muluku aalyihaka sayi othene ale, atthu imilyawu piili ni nuusu, mothakoni mme? Owo aaphwanya sayi yolya yothene?’ Ni kaanaakohaka amaama, 'Maama, Owo, ookhalana—ookhalana Yehova aattukuttha aalupale osulu iwe, ni Owo aamooxa mikatthe sothene, n'utthimaka ohiyu n'upweha va—vathi, wa atthu, ni wirimu wuulupale wa Yehova khareere-wo attukuttha?’ Awo yaaniira, 'Nnari, mwan'aka, khamureere oyeva wira musuwele saana. Moone, Yehova ti Mpattuxa. Owo khonaaphavela attukuttha. Owo onoolavula paahi, vano Masu Awe animoonihereya Owo alavularu. Owo ti Yehova muulupale, ni Owo aaroolavula paahi. Nto Malaikha n'ukawanyerya vathi, wa atthu.’

<sup>33</sup> “Nto olelo, vamoonyal'aka Owo weemela vale, mooweha mukhalelo ole owiitho Wawe? Khiwaakhanle hata ohoverya mmuupuweloni mw'Awe. Miyo khuwela wiithela wa mwala, khunweha okathi Owo aakuxaly'awe mukatthe khukawanya, khwaavaha a...arumeyi Awe, hiyo, wira naakawele atthu. Vano nto Owo vookonly'awe moonoo wira akawanye-tho, mukatthe owo waari woomalela-tho. Nto Owo aahiira yeeyo imaara imiya sene, mpakha atthu othene ovona, ni saahikhala ittanka, soosarya, saattotteliwe. Koosuwela wira eyo khaakhanle okhalaka hat'etthu woohikhala Yehova, okhala wira Owo iirale ntoko Yehova iir'awe. Yehova paahi t'oniwerya opattuxa. Ni koosuwela wira Mulopwan'ole kahiyona namawoka. Ori Mpattuxa mmosa paahi, nto owo ti Yehova. Nto vano, mwa itthu sothene koonaly'aka, eyo yaahikisivila.

34 “Kintthuna wira musuwele vano wira murim’aka ori wowiivahererya voomalela, ni kinnaamini voomalela wira Owo kahi profeta paahi. Owo profeta, masi Owo oomuvikana profeta. Owo kahiyo hat’etthu woohikhala Yehova Muluku onkhala ni hiyo, okhala wira Owo aahipattuxa mukatthe, ni aarina mihapo sa Yehova. Khivanxankiha Owo aawery’awe wira, ‘Kaahivareke miteko s’Atithi Aka, weso muhikaamini; masi kaavaraka miteko s’Atithi Aka, nave muhinawerya okaamini, mwaamini miteko, maana seiyo sinnikikhalela Miyo onamoona ni sinnihimya Miyo ki Pani.’ Yaakhala ntoko wira atthu yaamuwerya woona yeeyo, vookhweya-vo.”

35 Nto Yohani aahisiveliwa wira Owo aari Mesiya, Ole Yesaya aamuhimaly’awe wira, “Nooyareliwa Mwaana mulopwana, nto Nsina Nawe ninrowa okhala Namiruku, Mwene a Murettele, Muluku a Ikuru, Tithi a Mahiku othene.” Nto Yohani aahisiveliwa mwaha w’etthu oonaly’awe. Mwammirav’owo ahimiyaka onamoona awe.

36 Okathi ene yoowo, Simoni Petru khwira, “Ahe, vano, minuutu mmosa paahi. Naarowaka okhalana muthukumano w’onamoona, kaanithhuna okhalana etthu y’ohimya. Moosuwela, miyo nkaarerye okhala namahoverya a etthu yothene, okathi Antere munn’aka, yoowo aakhanle vamuhakalalihoni va Yohani profeta, yoowo aahimiyale wira Mesiya aamoowa ni wira owo aamurowa omooniherya Yoowo. Nto miyo kaahihoverya vakhani etthu Antere aakileel’awe, okhala wira kinniiwaka khula enamuna ya ihantisi sa Mesiya ni itthu sothene sikina.

37 “Masi nyuwo othene axinna munniwuupuwela atithi aka oowuuluvala. Nsina naya yaari Yona. Ni nyuwo munniwuupuwela yaawo, moota awo yaary’aya mulipa-oowaamini ooromeleya saana. Moota kiniwery’aka owuupuwela ame aka n’atithi aka, ni hiyo othene, okathi waatthatt’ahu ihopa wira nikhalane y’olya, nto khuhinaphwanya hata ehopa; naanithhuna mukatthe, ni moota naakokhorak’ahu vathi ni omuvekela Muluku, ‘Muniphwanyihe yoovara olelo, Muluku, wira niwerye otumiha ihopa sahu, nilive sinlokohiw’ahu, nikhalane yolya wira nilye.’ Ni moota naakhum’ahu ophareya, n’ittheke yuulupale, ni wiileva o—okumanaha ittheke iyo.

38 “Nto atithi aka, kinniweya woona maihi aya oottweelela ekhuruwenle-ene ottuli waya, nihiku nimosa awo khukilaathi vantthankani v’ekalawa khulavula ni miyo, yiiraka, ‘Simoni, nyuwo mwa mwan’aka muulupale. Moosuwela, miyo kweekwe kaanaamini, Simoni, wira kaammoona Mesiya. Atthu ahu annimuwehererya Yoowo okhuma w’Edeni. Ni hiyo nookupali wira Owo onnoorwa, hata wira vanoopisa. Soovira iyaakha ikonto xexe, enihimmw’aya. Masi kinnaamini wira Mesiya onimoorwa. Ni khula muYuta aanaamini wira aammoona Mesiya mwa nloko nawe. Miyo kinroromela wira kinoomoona mwa

nloko naka. Masi enkhala ntoko, koopacerya wuuluvala vano, kishaana ohiya ephareya, ni ophwanya ohaawa n'uwereyasiwa, alakela nkinrowa omoona Owo mwa okathi aka. Masi alakela nyuwo munoomoona, mwan'aka.

<sup>39</sup> “Ni kintthuna kooxutthiheni mwa Soolempwa. Mwan'aka, Mesiya ahinatthi okhumelela, sinookhala inamuna sothene sa itthu siniiraneya, inamuna sothene sa itthu soowoothiwa, okhala wira Satana onimwiira yeeyo, wira ahonone ekuxeryo murima ya Mesiya eekeekhai okathi Owo onirw'awe.” Kweekwe enikhhalaka siiso; nlelo ti siiso.

<sup>40</sup> Vano nto hiyo ninnoona wira, owo iirale, “Kinnuupuwela awo ekipwehenry'ene moonoo aya, khwira, 'Mwan'aka, eri enamuna emosa paahi munrow'anyu owerya omusuwela Mesiya. Vano naahikhalana iyaakha imiya sene nihirina hata profeta. Malakhiya t'ari profet'ahu ookiserya. Soovira iyaakha imiya xexe, khanirina profeta. Masi muupuwele, Moise oonihimeerya, mwa Soolempwa, wira, Mesiya arwa vale, Owo onrowa okhala profeta, okathi Owo onikhumelel'awe. Hiyo aYuta nihixutthiwa omwaamini profeta. Nto mukwaha wa Mesiya elapo ya vathi ti Masu a Muluku oolavuliwa, Owo onilaihenny'awe. Ni Masu kweekwe animurweela profeta, ni profeta onnilipiherya Masu yaawo. Muhikhalakhale muliyalaka yeeyo, mwan'aka! Pooti okhala itthu suulupale sinkhumelela, pooti okhala ivihereryo suulupale ni—ni itthu suulupale. Masi muupuwele, Mesiya onrowa okhala profeta, 'okhala wira hiyo noosuwela wira Muluku khonrukunxa ephiro Awe, ni Owo ohimnye wira Mesiya aarowa okhala profeta. Tivo muupuwele, mwan'aka, maprofeta t'ale arina Masu a Apwiya. Nto Mesiya arwa vale, onrowa okhala profeta.’

<sup>41</sup> “Miyo nlelo kinniwerya woona miyoono saya,” khwira Simoni, “okathi yaakipwehery'aya. Nto Antere eemenle vaavo araphihaka ntthavi, okathi uwo. Munnuupuwela yeeyo, Antere?”

“Ayo, Simoni, ki—kinnuupuwela.”

<sup>42</sup> “Nto Antere weererya okileela wira Yohani ula aari profeta. Kaahikhalana itthu sikina so wira, kaahaana otumiha ihopa n'itthu sikina. Vano soovira iyaakha atithi aka akhwiw'aya, masi kweekwe kinnisuka eyo mmuruni; atithi aka yiirale, 'Mesiy'ola onrowa okhala profeta oosuwanyehiwa ni Soolempwa, nto muhiliyale, okhala wira awo Masu a Muluku oolavuliwa. Ni Masu awo kweekwe anaarweelaka maprofeta voohihiyererya; eyo yoosuwanyehi, ahiiso ehooniherya wira yaahilahiheriwa okathi uwo.”

<sup>43</sup> Nto vano Simoni, “Nihiku nimosi,” khwira, owo khwira, “moosuwela, Antere khukivekela wira nirowe vamuthukumanoni. Nto miyo khurowa vale omuthukumanoni weiwo Mulopwan'ola, Yesu, aary'awe-wo. Ni kaahiiwa inamuna sothene sa inyakulelo. Aahikhala Yesu mmosa,



aakhumelenle, Owo ahinatthi, aahimiyale okhala etthu yuulupale, aweettihenrye atthu imiya xexe vano awo othene khupweteya, ni siiso. Miyo koono wira aari paahi mukina a enamuna yeeyo, ni evihereryo kamosa-kamosa yuulupale ya muhakalaliho, wala muromolelo mmosa muulupale awo yaarow'aya opaka. Masi nihiku nimosa kaahuupuwela orowa ni Antere va, munn'aka."

44 Ni kinniwerya otthokelela, okathi yoowo, ekalawa khupacerya ottikinyeya. Mutthu mmosa khupacerya okhuwela, ni wira, "Mukilaathi! Muhittelemihe ekalawa. Nwehererye minuutu mmosa. Mukilaathi mmaale."

45 Nto owo khwira, "Moosuwela, okathi oronw'aka iwe khukumana ethoni n'ethoni ni Yoowo, emaara yoopacerya, ovenya wene Owo khukiweha mmaithoni khukileela nsina naka. Owo khaatonko okoono khalayi. Kahi wira Owo aakisuwene miyo paahi, masi aanaasuwela atithi aka ale oomuttittimiha Muluku, yaakiixuttihale mwa Soolempwa. Nto kaahisuwela wira Ole aari Mesiya. Eyo yaahimaliha mwaha wa miyo, vaavale vene. Yaari yeeyo. Eyo yaahilakiherya, wa miyo."

46 Alakela aari Filipe iirale, "Pooti ohimya nuulumo va?" Vano owo khwira, "Munna Natanayeli, ela ehoonanariheni; okhala wira, moosuwela wira hiyo naahisoma isapala iyaakha n'iyaakha sinci-ene, ele Mesiya aarow'awe okhala. Masi okathi omoonaly'aka Owo airaka yeeyo, kaahirowa khumwiihana mpatthani aka va, Natanayeli. Nto varwiiy'awe . . ."

Natanayeli khwira, "Mukihiye kihimye. Mukihiye kihimye."

47 Oh, moosuwela, yookhala etthu khata okathi Yesu oniwiirel'aweni etthu, khamu—khamunwerya omaala, muhaana ohimya, mmansinyu. Kahi siiso? Yakhalaru etthu y'ekeekhai, muhaana ohimya tu. Okathi Owo okisarihaly'awe Eroho Yowarya, kaanithuna ohimya. Kintthuna wira mutthu asuwele yeeyo. Kahi mutthu mukina ohimya; kintthuna kihimye, mmansaka.

48 Nto kinnitthokelela paahi, Natanayeli aahikhala oothapa khwira, "Moosuwela, kaatthuna kihimye ela. Miyo kaanoohoveryani vakhani, Filipe, okathi okihimenry'anyu. Miyo kookohani, 'Wookhala wookhumelela-wo etthu yooreera oNasareti?' Vano nyuwo khukaakhula voomalela oreera mutthu otonko awe okhalana, 'Murwe moone.'" Eyo enniiraneya saana olelo. Ti yeeyo. Muhikhale owaani muulumelaka. Murwe, musuwele mmansinyu, moone. "Khwira, 'Wookhala wookhumelela-wo etthu yooreera oNasareti?' Khwira, 'Murwe moone mmansinyu.' Ni moosuwela etthu mwaakihimery'anyu.

49 "Nto okathi ophiyaly'aka Ohoolo Wawe, nto Owo khukileela wira kaari 'mu—muHeperi, mwIsarayeli, ni wira kaari mutthu naxariya,' kaahisuwela.

50 “Masi kaahitikinihiwa, ‘Vanweryaneya sayi okhala?’ Owo aakhala ntoko mutthu ene pure. Miyo kaawehererya wira Mesiya aarowa okhuruwa muxikattani ya weero okhuma Wirimu, mpakha wa mukhulupale a muromolelo nno, oYerusalemu, akhume aire, ‘Kaifa, Miyo koophiya.’ Masi khusuwela wira, Owo aakhumme oNasareti, vatthokoni voohaawiwa; ni vekeekhai ni nsina nimosa ntoko noonanara wa Yoowo, ntoko ‘mwaana ooraruwa.’ Owo eemenle va, owanre ikuwo soohisuweleya, kahi ntoko namukuttho wala mutthu; mutthu pure paahi. Nto miyo khuupuwela, okathi oronw’aka vale, ‘Vanweryaneya sayi ole okhala Mesiya? Owanre nlaya na khalayi, Owo aahiwara okhuma okathi waary’awe mmiravo, nto va owanre nlaya nimosaru nenla; nto maihi Awe akhuruwelaka ottuli Wawe. Ni ntoko mutthu pure a mmawaani.’

51 “Vano Owo khukiweha wiitho, khwira, ‘Filipe ahinatthi owiihanani, mury’ene vathi va mwiri, Miyo kaahiwoonani.’ Eyo yaahimaliha mwaha wa miyo. Kaahisuwela, ni Masu, wira ole aari Mesiya. Ole aari Yoowo.”

52 Nto khino ekalawa yaahittikinyeya, vano muthukumano w’onamoona waamwiiraneya. Oh, okathi xeeni wooreerexa awo yaarinas’aya, mphareya mme, oviriha okathi muulupale tu.

53 Antere khwira, “Kaaniythuna ohimya etthu emosa yaakitikinini’he okathi vakhani. Munnuupuwela okathi na—naarow’ahu oYeriko? Owo khwira, ‘Nihaana owelela; Miyo kinniphavela ovira oSamariya.’ Vano, Owo khuvira oSamariya nto muttetthe wa oSikari iwe, okathi aanirumaly’awe hiyo othene orowa othuma solya opooma.”

54 “Oh, ayo, kinnuupuwela yeeyo, ahe!” Othene aya, “Ayo, ayo!” Ekalawa yaamuttikinyeya paahi, atthu othene akhalanaka onamoona wooreera vaamanly’aya muhakalaliho. Vano awo yaarina muthukuman’ola w’onamoona.

55 Nto owo khwira, “Ayo, ni nyuwo munnuupuwela wira naahirwa naanaanoru, ni, otuthuwa wahu, khumoono Mwixuttihi ahu alavulaka ni namuttompe oosuweliwa. ‘Uh-huh,’ hiyo nuupuwela, ‘ti yootakhala. Nkanweheni vale onlavula ni mwaamuthiyan’ola. Ni aaroniruma, nto va Owo ori va ni muthiyan’ola oohifayi okilantho va.’ Muupuwele, hiyo neemenle ottuli w’etakwarikhwa, ni naahiiwa nvaanelo aya.

56 “Nto hiyo naahimwiiwa Owo amuhimeeryaka wira, ‘Muthiyana, mwaarowele aiya’anyu murwaase va.’

57 “Nto hiyo khwira, ‘Ahe, siiso hiyo naavonyale, alakela muthiyan’ole aari ootheliwa voolikana.’

58 “Nto owo khunweha Owo wiitho, khwira, ‘Napwiya, nkirina aiya’aka.’

59 “Munnuupuwela moota mirima sahu soonaly’aya? ‘Mesiya’ahu muulupale hiyo naamuroromel’ahu, va aaphwanyiwa

oothaka, oovariwa, 'okhala wira Owo iirale, "murowe mwaaruhe aiy'anyu," nto muthiyana aahihimya wira khaarina iy'awe. Vano yoomutthikela Yoowo.' Munnuupuwela moota hiyo othene naary'ahu ntoko ootuthuwa, nto iphumu khunimalela?"

"Ayo, kinnuupuwela."

<sup>60</sup> "Vano nto munnuupuwela moolumo yaattharelane? Owo iirale, 'Moohimya ekeekhai, okhala wira mwaahikhalana athanu, nto ole munkhalan'anyu vano kahiyo awinyu.' Oh, munnuupuwela muthukuman'ole w'onamoona ottuli w'etakwarikhwa? Wulu!" Moone, khivanweryaneya omuxintta. Owo Mulukuu. "Oh," Simoni khwira, "eyo paahi. . ." Antere khwira, "Eyo yaahimaliha mwaha wa miyo."

<sup>61</sup> Partolomeu khwira, "Mulipelele, kaatthuna kihelele onamoona. Kiireke, axinna?"

<sup>62</sup> "Oh, ahe, kinoona wira pooti, khanireerane okathi. Owo khonarwe nlelo, tivo ninrowa weettiha ekalawa vakhani. Hayani, Partolomeu, muhimye onamoona."

<sup>63</sup> "Ahe, emosa wa itthu suulupale wa miyo. Munnimuupuwela munn'ihu muthiyana oYeriko, oniihaniwa Repeka?"

"Ayo."

"Nto aiy'awe yeettiherya eresteurante ohitto iwe."

"Uh-huh."

<sup>64</sup> "Ni—ni awo yaari mulipa a nakoso, nsina naya naari Sakewu."

"Ayo, ayo, kinnimuupuwela saana."

<sup>65</sup> "Munnuupuwela, owo aari—owo aari mmosa w'axinn'ihu athiyana. Owo aahiwaamini Apwiya, nto aanoova Sakewu ohiya ovira sothene ahimukupanli Yesu. Nto, oh, Sakewu aari mpatthani ooreera murima a namukuttho iwe. Nto vo owo aanivekela wira yiiraneye etthu wira maitho awe etthukuwe, ni wira asuwele wira ola aari Mwiixuttihi, ola aari Masu oolipihiriwa a Muluku, oowiipaka erutthu eriyari ahu. Ni hiyo naahehererya omuleela. . . omuleela owo moota Yesu a oNasareti aasuwel'awe isiiri sa vamurimani, ooniheryaka wira Owo aari Masu, 'okhala wira Masu annilamula sinuupuwel'aya murima.

<sup>66</sup> "'Ethiru,' owo khwira, 'Miyo kinimwaamini namukuttho. Etthu enihimya'awe namukuttho t'eri yooreera wa miyo.' Okhala wira owo aaniira mpantta wa sothene—mitthenkeso sothene sa mmuttettheni, aKiwanis ni itthu sothene sikina, moosuwela, tivo owo. . . wa owo yaari yoolipa owo ohiya eyo. Tivo Repeka aahinivekela hiyo othene wira nivekele, nivekele. Nto khula okathi naaphiyery'ahu mwaha wira Owo aari profeta, owo iiraka, 'Ethiru! Namukuttho onihimya wira "Owo ti Pelizepuli. Owo ti xetwani. Owo onipaka eyo n'uwerya wa xetwani.

Ni Owo namathokorerya miyuupuwelo. Ti yeeyo tu ekhanle. Khekhanle hat'etthu mwa yeeyo." Tivo khiivo etthu ene eyo mahiku ala; hiyo khanirina maprofeta mwa iyaakha imiya sene. Ni vaaweryaneya sayi Mmirav'owo, ohirina hata ettikitti y'opatthana, vaaweryaneya sayi Owo okhala profeta? Oh, khiivo enamuna ya Owo okhala etthu iyo!

<sup>67</sup> "Masi, moosuwela, Repeka khutthikela okhala oororomeleya, amwaar'awe, ni avekelaka. Nto voosiisu umosa Yesu arwaaka mmuttettheni, ahe, vano ninnoona wira, Repeka aahinileela wira Sakewu aahikhumela m—mphironi, wira amoone. Vano khaamini wira Owo aari profeta, tivo owo khwira, 'Miyo kinoorowa omuweha saana,' moota owo aanihimenry'awe onamoonna hiyo orestaurante nihiku nlo okathi waaly'ahu. Vano owo khuwela mmuraleni, khwira, 'Moosuwela, miyo kinimwiipaka osulu nno wira Owo ahiwerye okoona. Miyo ka mutthu ooyeva, khula enamuna, ookhoveya saana. Ni nkinwerya omoonna vathi vale, eriyari ya muttitthi, tivo kinrowa owela osulu nno mmwirini.' Vano owo khurowa nipuro piili—irintta piili sinkumun'aya, nto khukilaathi vaavo, varinttani seiyo."

<sup>68</sup> Nlo nipuro nooreera tu okilaathi-vo ni osoma mwaha ene. Ti vaavo sinkuman'aya iphiro piili, yawinyu ni ya Muluku; ankhili anyu. Eyo etthu yooreera, wuupuwelela.

<sup>69</sup> "Vano owo khwira, 'Moosuwela, Owo siiso akhanle-ene profeta. Vaamuwaryaneya Owo okhala. Vaamuweryaneya miyo ovonya. Tivo kinimooleelani etthu, kinoorowa omuweha oratteene Yoowo; nto Owo khanrowa okisuwela. Vano kinookuxa mataakhuru othene kivure sa, kiipweherye, ni kinimwiipaka wira Owo ahikoone hata vakhani. Nto kinoomoonna okathi Owo onivir'awe. Vano Owo aahikhale ntoko mutthu oothuneya, miyo kinoorowa omuleela Owo oratteene, kikilanthi-ene mmwirini mu.' Vano owo khuweha, ni aahikhalana ntaakhuru aawery'awe ovenxa ni omoonna okathi Owo aarukunuw'awe vakompa.

<sup>70</sup> "Nto okathi Owo orukununw'awe vakompa, eettaka muramphani, moosuwela, awehaka nno ni nno, ni awiixutti yiiraka, 'Mususe. Kileveleliwe.' Vano atthu n'anamwane aretta ni itthu. 'Kileveleliwe, Mwixuttihi khoreere okhulumuwa; mutek'ole muulupale nsana ohiyu. Nto, mwa enamuna yoolakeya, xontte mususe mmuhiye Owo avire. Ahe, Owo onthara ephiro arowaka opooma, nto xontte mwaamutthuna osusa?" Nto Sakewu okilanthi-ene osulu nno mmwirini, amuwehaka Yoowo vathi.

<sup>71</sup> "Nto Yesu khurwa khulukama vathi va mwiri, khweemela, khuweha osulu khwira, 'Sakewu, mukhuruwe mmo. Kinrowa owaani ni nyuwo olelo, wira nalye y'ohiyu.' Eyo yaahimaliha mwaha wa miyo. Owo aahisuwela wira aari osulu iwe, ni aanisuwela nsina nawe, etthu aary'awe. Eyo yaahimaliha mwaha. Ole ti Mesiya, wa miyo. Ayo, mulopwana. Okhala

wira, noosuwela wira Mesiya aari wira aire yeeyo. Vekeekhai. Tivo Owo aahaana orowa owaani ni yoowo, khwira, nihiku nle n'olya y'ohiyu. Okathi xeeni ule muulupale waary'aya! Hiyo ninnuupuwela.”

<sup>72</sup> Moosuwela, siiso waakhanle okathi yoole, muthukumano w'onamoona wiiraney'aya. Moosuwela, awiixutti ala vale ophareya, ehimyaka onamoona, siiso waakhanle w'epiphini y'ohiyu nipuro nlo, epantte onkela epheyo iwe, khino Satana aathurumenly'awe vamwaako khuweha vathi. Owo khuweha muthukuman'ole w'onamoona, nto khusuwela wira awo yaaronwe ehikhalanse ni Yoowo. Vo ti waari okathi awe.

<sup>73</sup> Moone, kinoona wira yookhumelela eyo yoohokolowa-tho, yoothikela. Awo yaahikhalana, evihereryo ya muhakalaliho, awo yaaronwe ehikhanle ni Yoowo. Ni kookupali wira ennilattana saana n'ile ennikhumelela olelo, wira, okathi ula w'evitikavitika, ni nuuvira muhakalalih'ola muuluaple hiyo noonaly'ahu. Owo woovira mulaponi wothene. Khula elapo yookhalana mooro wa muhakalaliho, ni onoovarela; miteko suulupale sa ovonihia; athu yaakhelaka Eroho Yowarya, imaara ikonto ikonto sene. Nto mwa ethapelelo ya yeeyo, ntoko awiixutti ale ehimyaka onamoona w'etthu Owo iiraly'awe, “ni, oh, hiyo noomoono Owo wira *ela*, ni noomoono Owo wira *ele*,” Kookupali wira hiyo nookhuma nihikhanle ni Yoowo, ntoko yaawo.

<sup>74</sup> Hiyo nirookhuma nittharaka mireerelo suulupale mu—muhakalaliho woonihenry'aya. Hiyo nirookhuma nirowelaka mireerelo s'ophwanya musurukhu munci-ene, ikereja, oteka ipa suulupalexa, mapuro maalupale a itoolare imilyawu sene, ixikola suulupale, iyeettiheryo s'osoma, ni ninnuwihaka muroromolelo ahu. Vano nto nikhalanaka itthokiheryo sahu sa komunismu, soowanana komunismu, ti yeeyo tu nikhany'ahu olavulaka olelo. Vano naanaanoru, Satana khunoona mmitthokiheryoni sahu s'owanana komunismu, mwa itthokiheryo sahu suulupale sa muromolelo, ni mwa “imilyawu sowaatta,” ni sikina, ntoko sikhalaniw'aya.

<sup>75</sup> Nto hiyo niroorowa nihikhalanne mithukumano sa mavekelo sa khalayi ni opatiiso w'Eroho Yowarya sihokolowaka, mpakha mooro ohalela ottipha. Nyuwo pooti okhuwelela, ni wehererya waaruuha athu waltaari, nto awo animweetta paahi ntoko wira anihalela okhwa, onnaarikela orwa. Vano nto waavekela arumeyi wira arwe evekele ni yaawo, “Oh, xeeni okivekelaka miyo?” Nto awo anoophiya vo, ni ti voorika waaruuha. Vano awo animweemela vale minuutu vakhani paahi, woowehani, n'utthika n'ukilaathi mukhaterani mw'aya. Wa miyo, mooro woottipha! Yookhala etthu ekhumelenle. Nwiriyanee! Etthu entthun'ahu muhakalaliho, yoowo anatampi, emuwehaka Kristu, anrukunx'aya murima, otthimakela waltaari ni

matat'aya osulu, evekelaka omoreliwa ikharari, ni ekereja yothene enkhal'aya mooro, ni ovuwa wa Muluku.

<sup>76</sup> Evihereryo ahu wa mureerelo w'owunnuwiha miromolelo sahu, nooteka ixikola suulupalexa wira naasomihe arumeyi ahu, ni waarakameliha wa Muluku ovikana saary'aya wopaceryani. Muluku khansuweliwa ni osoma. Owo khansuweliwa ni teoloxiyya. Muluku onsuweliwa ni waamini. Khivanweraneya omutaphulela Muluku. Owo khantaphuleleya.

<sup>77</sup> Nkawehani etthu ekhumihenry'aya, hiyo aPentekosite naakhalaka apentekosite. Axithiyan'ahu ammettha maihi aya; animwiiipintari. Axilopwan'ahu anooththuniherya. Arumyi ahu anooththuniherya. Awo animoova ohimya etthu ya yeeyo. Ekereja enoowoomola awo yaira-ru. Oh, vakhala wira khonnitthuna otatha empa, okhuma vapulpitu mpakha vathi. Ti yoowuuliha muru. Otakhaliwa.

<sup>78</sup> Mulopwana mmosa aahikirweela, kahi khalayi, khwira, "Munna Branham, athu annoophentani." Masi khwira, "Nyuwo okathi wothene munimwaapwapwela, waapwapwela athiyana awo, mwaha w'okhalana maihi ookhweya ni itthu siiso."

Miyo khwira, "Bibilia ohimye wira ti yootakhala owo okhalana."

<sup>79</sup> Owo khonaattittimiha aiy'awe airaka-ru siiso. Ni eyo ethoonyeryo khuluwiru wira mookhuma wa Muluku. Muupuwele, mwaha wa Sansoni, maihi oorakama yaari ethoonyeryo y'oNasiri wira owo aahihiya olumwenku, khurwa mwa Masu a Muluku. Nto mwaametthaka maihi anyu, athiyana, munookhootta wira mwa ethoonyeryo y'oNasiri. Moorowa oHollywood ohiya otthikela mBibiliyani. Bibilia oohimya, "Awo ehimethiweke." Moone, ti yoowuuliha muru, ni arumeyi khanihimya etthu ya yeeyo.

<sup>80</sup> Mulopwan'ola khukiirela, "Muhinaahiyeryani athiyan'awo mmansaya?" Khwira, "Awo aniwoonani ntoko profeta."

Miyo khwira, "Miyo nkinahimyeke wira ka profeta."

<sup>81</sup> Khwira, "Awo aniwoonani ntoko yoowo. Mwaaxuttihe moota wo waakhela soovaha sa erooho ni wira etthu. Mwaahaana waaxuttiha itthu suulupale, itthu suulupale."

<sup>82</sup> Miyo khwira, "Kinwerya sayi waaxuttiha alixepa awo ehimwiixuttaka ABC aya, moota wookhala voophwanela? Munrowa wira sayi? Ayo, murowele etthu yoopacerya."

<sup>83</sup> Eyaakha ti eyaakha, kivraka mulaponi, enootepa khula okathi. Yookhala etthu evonyeiye nipuro nlo, kahi ni Masu. Khivanxankiha hiyo ohikhalanaka mooro wa muhakalaliho. Onnitthuna okathi w'otatha empa. Muluku khankhalakhala airaka eyo mpakha nitthike-tho. Onnitthuna okathi w'otatha empa.

<sup>84</sup> Ni nyuwo alopwana, munaahiya amwaar'inyu wira etthu ntoko eyo, waawara akaputtula! Awo kahi aMetotista, aPatista. Awo t'aPenetekosite, ti yeeyo, "yooneyaka ntoko oothunku, Okathi wa Ekereja ya Lawotiseya, yookuttihiwa," Pentekosite nsina, ti yeeyo tu. Pentekosite khanihiyo nsina, musuwelelo wa opatiiso wa Eroho Yowarya, enaakukuttha atthu. Khivanxankiha hiyo ohiweryaka okhalana miteko suulupale sa ovoniha ni itthu, yookhala etthu ehilonke nipuro nlo. Ti Satana, ononale neereryaka o . . .

<sup>85</sup> "Ahe, hiyo nahimyaruru etthu mwaha wa yeeyo, awo animwaakakhanya opatthana waya."

<sup>86</sup> Muupuwele, khanlemeihiwa aKristu. aKristu toolipa. Awo alopwana n'athiyana a Muluku, animweemererya Muluku, voohicala etthu mutthu mukina orin'awe ohimya. Khamurina waavara metto ni waakhanyererya, ni owunkheleliha ni oweepesa. Iyo miri sa muxituufani, sa naanaano, khasihiyo sooreera hata vakhani, khasinkhalakhala siimaka etthu.

<sup>87</sup> Enikuupuxerya, ntoko e . . . Naanaano onookhala okathi w'otthokiha epuru. Miyo kaaweha axipalame axikhaani olelo, iwe, iphera sikhaani sikunxe-ene malaxi siroiha mpuruni mwaya. Khivanrowa opisa sinookhala sipakaka ipuru, sirelaka mooce aya wira suuramele. Moosuwela, mwaapalame mwaamukhaani onniwerya okhalana epuru ya mooce, ni onniwerya okilaathi vapuruni vale va mooce, ni onnirukunxa khula minuutu vakhani; onkuxa mwetto awe mwaamukhaani n'urukunxa, ni onikilaathi vaavo. Vano, owo ahiyaru mooce ale oriiriwa, amanle-ene oviherihiwa, khanrowa otothola. Nto owo onoovava vakhani khuphwanya yolya vakhani, n'utthikela-tho yaawo.

<sup>88</sup> Nto moosuwela, mai ule mwaapalame, aamuwerya okilaathi vaavale vamooceni vale, n'urukunxa khula minuutu miili, ni ohi . . . hata onimwiivaha n'utthukwa mpakha oteettheya vahinwery'awe okhuma vapuruni. Masi voohikhala wira, nto, mai ule mwaapalame onookumana ni mwaapalame oolopwana, mooce ale khanrowa otothola. Hata wira, moota xeeni muneepes'anyu, khanrowa otothola. Anrowa okhala mpuruni memme yintte.

<sup>89</sup> Nto vakhala wira waahitoko okhala okathi vaatthuney'aya Pentekosite okumana ni Mulopwana, Yesu Kristu; 'okhala wira khanimpchwanya etthu voohikhala epuru esareiyee mooce oowuntta, okhootta Waamini, erowaka Mukonselyo Ekumeniku, ni wiihana itthu suulupale, okilaathi vakhiviru ni paapa, ni wira "ti sa erooho." Exeeni eniwiirani, nyuwo aPentekosite? Khamunsuwela wira Bibilia ohimnye wira itthu iyo saamukhumelela? Ni hiyo ninookhuwelela 'okhala wira aMetotista ni aPatista anookela-mo, vano nto itthu iya sikina sothene siiso. Khamunsuwela wira okathi mwali aarumpe

aarowaly'awe othuma Makhura, waari okathi ene yoowo Mutheli aaruuly'awe? Vano awo khayaaphwannye Makhura! Moosuwela, Okuxiwa onrowa orwa ni mwiitiho, n'urowa, okathi uwo, nyuwo hata khamunrowa osuwela ni wiiraneya. Eyo enrowa wira eronwe-ene, munootikinihiwa etthu ekhumelenle.

<sup>90</sup> Ntoko Yohani aarwiiye elapo ya vathi. Vano awo khumwiirela Owo, khwira, "Ahe, Bibilia ohimnye wira, Eliya ohaana orwa toko." Owo khwira, "Owo ohoorwa, nave nyuwo khuhisuwela."

<sup>91</sup> Enrowa okhala siiso, nihiku nlo, atthu anrowa wira, "Koono wira waari wira wiiraneye ohinatthi ophiya okathi w'Ohaawa. Koono wira Okuxiwa waahaana wiiraneya." Vaamuweryaneya moolumo otthika, "Ohiiraneya nave nyuwo khuhisuwela." Uh-huh. Pooti okhala vaxiye-ene sihinuupuwelel'anyu. Oh, nvenye, ekereja! Vanreerela kihije yeeyo; miyo nkinarweeke va mwaha wa mwiixuttiho, miyo kirimuupuwela paahi okeliha eyo vowaakuva wira nwerwe okhalana eyo mwa epantte emosa.

<sup>92</sup> Muupuwele, munna, Satana ohoona itthokiheryo iya suulupale, ekereja emosa enererya ovikana ekhw'aya, muromolelo mmosa oneererya ovikana mukhw'aya, ekumihaka ohisoma wothene ni okhala waavaha mmwaleyo wa pisikoloxiia, okhalana pisikooloku wira ammwaleyeke mutthu owo ahinatthi orwa mmapuwani mwa muteko. Pentekosite! Nnari, awo—awo—awo kahi maPrespiteriyaano, awo t'aPentekosite. Omwaleiwa muupuwelo onvekeliwa nikhuru nimosa n'aPentekosite, nikhuru nuulupale, mamisionaariyu ehinatthi orwa vapuwani.

<sup>93</sup> Ankhi awo yaarina emwaleiwo siiso? Awo yaahimwaleiwa. Waari omwaleiwa wa pentekosite wopaceryani, okathi awo yaalipelenly'aya empa y'osulu mpakha Mooro orwa okhumaka Osulu, ni Owerya wa Muluku. Iwo ti waari omwaleiwa.

<sup>94</sup> Kahi pisikooloku a molumwenkuni, oohapaliwa vakhani oneemela vale oneererya muupuwelo, vakhala wira mootannyeya vakhani, wala etthu, wira, "Nyuwo khamulonke voomalela." Okathi, eyo vekeekhai ennooniherya wira mutthu ori a erooho vootepexa onikhala oowuukhuwa, ohaana okhala mwa mukhalelo yoowo wira akele mwa Yeeyo. Vano eyo vo, moone, ni otepanyasa paahi etthu Muluku otthunaly'awe wira iyaakha sinci-ene, ni ohokolowa ni itthokiheryo saya ni sawaya suulupale. . .

<sup>95</sup> Awo ari ootthapa okathi aniwoon'aya atthu anci-ene ethukumanne vamosa. Aniira, "Vaakhanle wira kaaniwerya waakhaliha othene ale Asempeleya! Vaakhanle wira kaaniwerya waakhaliha othene ale maUnisista! Vaakhanle wira kaaniwerya waakhaliha othene ale aMetotista!" aMetotista aneererya waakhaliha othene aya aMetotista, aPatista aneererya waakhaliha othene aya aPatista, aPentekosite othene



aPentekosite! Oh, khamunwerya wira hat'etthu ni yeeyo, Muluku ohaathoma okhuma opattuxiwakaru olumwenku. Nihaana olaleya Ehapari yooreera. Ti yeeyo tu. Masi, itthokiheryo sahu suulupale, hiyo nirookhuma nihikhalanne Mooro owo. Hiyo nirookhuma khwiipakela mooro w'owaani, p'uhimya wene.

<sup>96</sup> Ni komunismu ahu, vano khanireere otuthuwa, komunismu ookela, "Exeeni enrowa okhumelela?" Masi, moosuwela, etthu yuulupale kahi komunismu. Mukihiye kooleleni yeeyo vano, miyo nkinimoova komunismu.

<sup>97</sup> Masi etthu kinoov'aka, nyuwo aPentekosite, Ekonselyo Ekumeniku ila enrowa wookuxani. Eyo t'itthu ene. Eyo enrowa okhaliha ekanyeryo ya nxeni, ni nyuwo munrowa okhala ookela-mo. Okhala wira nyuwo mwa mutthenkeso, muhaana okela-mo ahiiso okhuma. Eyo ti etthu ene, khula mutthu ooreera, ootthokelela, a erooho onnisuwela eyo. Hiyo nintthuna onamoona mukina vasulu v'ephareya, ninoophwanya vano. Nto aPentekosite ahu, anoomirya paahi, coolo, mukhoi ni ecumpu, "Etthu xeeni yuulupale enrow'aya okhala." Okathi, aMetotista, maPrespiteriyaano, aLuteraano, ekereja ya Kristu, n'aPentekosite, murin'anyu okhootha-okhootha mwiixuttiho anyu muulupale w'arummwa, wira mukhale memmo. Awo ahaana wira yeeyo. Khamunrowa okhalana hat'etthu y'ohimya mmo. Yothene enlipihereya ni Rooma, vekeekhai yeele yooniheriwe. Yoolepwa ehimnye siiso.

<sup>98</sup> Exeeni eniwiira alaleyi anihiyererya itthu iya okela mwa mukhalelo yoola, ehaalopolaka atthu? Muluku onimwaavekela eyo mmatatani mwaya. Okathi ene yoola wa mukattyamiho, awo yaari mmukattyamihoni, yaahikhala. Kahi komunismu onkela; ti Ekonselyo Ekumeniku enrowa omirya nikhuru nothene. Nto muupuwele, mwaairaka, "Khenrowa..." Eyo enookhumelela, vano vahooxa. Muniira mwaakhenle-ene ekanyeryo ya nxeni. Muniira mpantta wa yeeyo nto.

<sup>99</sup> Vanreerela mukele vatthu mukhanly'anyu ootthyawaka yeeyo naanaano, ayo, mulopwana, mutthittiwe ekanyeryo mOmweneni mwa Muluku. Erutthu ya Kristu ti Erutthu ya siiri ya Kristu, munipatisiw'anyu Memmo ni Eroho Yowarya; kahi wiitakanxa Memmo, okuxiwa Memmo, olavuliwa Memmo, olavula ilavulelo Memmo, okhuwela Memmo. Muniyariwa Memmo, ni Eroho Yowarya. Ti yeeyo. Vekeekhai.

<sup>100</sup> Vano hiyo ninniweha itthu iya, mukattyamiho onikhumelela voohiwehererya. Oh, xetwani aarooweha khwira, "Uh-huh, awo aahapuwela ololo, arisa vale etuphaka ethweelasaka, enyakulaka, evirihaka okathi muulupale. Moosuwela, naanaano va p'ukathi aka wo waapwiniha. Kinimwanlela ikuhu vano."

<sup>101</sup> Vano owo khuyenya vamwaako khupacerya wuuseelela ephumu awe ya veneno, wish, "Mahiku a miiriya aamala.

Opacerya wene, kookupali wira aththu ala arimuukhuwa paahi. Kinoona wira yaahaana o—o—omwaleiwa muupuwelo aya ehinatthi orowa mmapuwani ilapo s’okhopela.” aPentekosite! Uh-huh. Nkoonani ephumu awe ya veneno yivvaka Masu, “Oh, kinoona wira Eyo etthu ekina, ko—kookupali eyo. . .” Moone, etthikelaka naanaanoru ntoko miromolelo sikina siiraly’aya, vekeekhai eyo t’ephiro awo aneett’aya-mo. Animwiira, eyo enniiva. Okathi ene yoowo muntthokih’anyu, eyo enimwiira. Ti siiso kweekwe. Kweekwe enrowa wira siiso. Khenrowa-tho ovenya. Khenasuweliweke mwa wahala. Mwa—mwa Okathi ula wa Ekereja ya Lawotiseya, Kristu aari ota w’ekereja, amanaka nsele, athunaka ovolowa. Vano awo khanwerya ovilela tu Yeeyo. Khanwerya wiiwelela Yeeyo. Vano ninniphwanya wira, okathi onikhal’ahu, mukattiyamiho wookela.

<sup>102</sup> Vano nto nimpacerya osuwela wira, miiriirya khasiniiraneya-tho, ntoko saary’aya. Aretta anrowa owaani aretta. Kahi mwaha wa Muluku. Mwaha w’ohalelaka muhakalaliho eriyari y’atthu. Khuuvo muhakalaliho. Awo—awo anookilaathi ni wiiwa; orowa owaani, aniira, “Ahe, kinoona wira khiyaareere oreera. Uh-huh.” Moone, khuuvo wiivaha iwe. Khiivo etthu ile mw’atthuni yaatthuneya okhala-vo.

<sup>103</sup> Kinnuupuwela iyaakha muloko ni thanu sivinre, wArkansas nno, okathi waarin’aka muthukumano mwaamukhaani osulu iwe oJonesboro, okathi aththu oophiyaka ikonto xexe yaatthun’aya okhala-vo, orwa vamuthukumanoni muttetthe mmosa w’atthu oophiyaka ikonto muloko ni thanu. Nto awo yaarupaathi vathi va ikamiyawu sa nxotte ni itthu sothene sikina, ni waakhuneela ipaphelo an’aya aretta, wira evolowe mpaani paahi. Awo yaanikilaathi mukhaterani mwaya n’uhikhuma, othana n’uhiyu, ni yaanaaruma oophentiwa aya orowa othuma iphawu ni e—esuupha ya yoowurya yooriirya; n’ukhala vaavale, nihiku ti nihiku, nihiku ti nihiku. Mirima saya saanivihiwa, mwa mooro. Etthu yaamukhaani paahi Muluku iir’awe, yaanaavihiha. Nto imiya sene a yaawo yaanikela.

<sup>104</sup> Owo Muluku mmosaru nlelo, ohiy’ula, Owo aary’awe iyaakha muloko ni thanu sivinre. Owo Muluku mmosaru nlelo, ohiy’ula, Owo aary’awe okathi opattuxaly’awe erimu ni vathi.

<sup>105</sup> Masi exeeni iyo? Hiyo nirookhala othene ootthapa khutthuna oteka mitthenkeso sahu, khutthuna oteka *ela*, ni oteka *ela*, n’upaka etthu yuulupale ni yookarya, wiilikanyiha ni maJones, n’aMetotista, ni aPatista, ni maPrespiteriyaano. Nyuwo khamuhiyo a yaawo. Nnari, khamuhiyo. Awo aththu a mmuromoleloni, yeeyo eri yooreera, hat’etthu ya nthowa n’awo. Aakhala aKristu anci-ene ooreera murima eriyari aya, masi khamwaarina wiitakanxa muhina mwa makhuru awo oohaamini. “Aththu anikhootta Owerya,” khamurina waakhaliherya.

<sup>106</sup> Moosuwela, mulattu ene t'ula, nyuwo muneererya okeliha Hollywood mukereja. Etthu yaatthuneya nyuwo wehererya wira waari omukumiha Hollywood mukereja. Munnona? Muneererya okhaliha ipa sanyu sooreera saana, muneererya okhaliha muromolelo anyu muulupalexa, mpakha onrow'aya waavara murima atthu. Hiyo khanikhanle orowa epantte aya. Nihaana waaruuha epantte ahu. Sothene sookarya, muupuwele, Hollywood onaarya ni itthu sa molunwenkuni, nave Ehapari yooreera enkokola mwa wiiyeviha. Wookhala ovirikana wa waarya ni okokola. Ehapari yooreera enkokola mwa wiiyeviha, ni wiimaaliha, wiiyeviha, ni owerya. Nave, Hollywood onimwaarya, ni atthu othene ethhapelaka ni enyakulaka, ni yuukhuwaka memmo. Munnona? Hiyo kxanimphavela yeeyo.

<sup>107</sup> Ninthuna okhala mwa Waarya. Owo ohimnye wira, "Nyuwo mwa maakha a mulaponi." "Maakha yamala osiva waya," eyo t'ikuru saya mwa Ehapari yooreera. Naahaana okhalana etthu eneetta mukereja mwahu, yeeyo aMetotista, aPatista, maPrespiteriyaano, ni othene akina, yaarow'aya otthuna orwa. Naahaana okhala oolukiwa saana! Maakha annivoliha ntthona, anniruha ntthona. Maakha ti esivelo, yaakwanyaka. Ahaana okwanywiwa.

<sup>108</sup> Ni hiyo ninnoona wira, ilolo sahu suulupale nineererya wiilikanyiha n'aMetotista ni aPatista, ni ipa suulupale ni mapuro maalupale, n'atthu ooreerela ni oosoma, ni ixikola suulupalexa ni ikolexiyu suulupalexa, ni itthu sothene ntoko seiyo. Hiyo nirookhumela elolo, nto va mukattyamiho khukela.

<sup>109</sup> Vano muupuwelo wa erooho onoowehaweha ni wira, "Va, nwehererye minuutu mmosa va, hiyo othene ninrowa okhala okela Mukonselyo Ekumeniku iyo? Nihuru nahu nothene ninrowa okela-mo?" Vekeekhai, munoorowa. Eyo ekeekhaii. Nyuwo nwehe yaahikhale siiso. Bibilia ohimnye wira mwaamukela, vekeekhai, ni Kristu aarowa okhala ota. Mweeri waahiriipela paapa ahinatthi (ole oopacerya aatonko orowa oRooma), ohiyu uwo, owooniheryakani ethoonyeryo wirimu. Voohiwehererya, yaahiraneya. Moota Apwiya aniir'aya itthu mahiku ala, soothamaleya!

<sup>110</sup> Vano mwa okathi ula muulupale w'epiphi, okathi awo yaary'aya weiwo, ittheku khuyenya. Miroromelo sothene s'ovuluwa saahimala. Vano munrowa wira exeeni muromolelo anyu wakela-ru Mukonselyo Ekumeniku? Exeeni enrowa wiiraneya nto ni itthu sahu sothene suulupale hiyo nitekaly'ahu elapo ya vathi, nihirina nrromelo wookiserya?

<sup>111</sup> Masi moosuwela, okathi yaahalel'aya okhuwela, ni miroromelo sothene simanle-ene, khivaaweryaneya woopoliwa; naanaanoru, awo yaahimoona Owo arwaaka, eettaka vasulu va maasi. Okathi w'epiphi, Owo aahirwa, eettaka.

112 Moosuwela? Okathi Owo aahiyaly'awe, Owo aahisuwela wira eyo yaamurowa wiiraneya, tivo Owo aawenly'awe mwaako woorakamexa waakhanle mulaponi. Mwaawelaka-ru osulu saana, munootepa woona ottaiwene. Nto Owo aaroowela wira aaweheke saana, moosuwela.

113 Ni Owo aahisuwela wira ela yaamoowa. Owo aahihimya khalayi ene wira nihiku nla naanirwa. "Ntoko saary'aya mahiku a oSotoma, siiso onookhala orwa wa Mwaana a mutthu, okathi Mwaana a mutthu onrow'awe wiisooniherya." Vano, Mwaana ohaana wiisooniherya. Nloko nla nootakhala ni noohiwelela nimphavela ethoonyeryo. Ninookhalana ethoonyeryo. Ninoorowa okhoota ntoko awo siiraly'aya okathi uho, masi enrowa okhala ethoonyeryo yo ohihimuwa. Owo nlelo mukumii, oniira ntoko siiraly'awe.

114 Hiyo ninnoona, wira okathi ula muulupale, awiixutti ale eripiwe-ene murima, Owo aahiwela wira aaweheke saana. Owo aakilanthe vasulu vale vamwaako, aawehaka saana.

115 Nto vano Owo khawenle mwaako okathi ula, masi Owo owenle okhuma mmahiye, khuwela musulu, ovikana mweeri, ittheneeri, mpakha orowa osulu saana mpakha varin'awe oweha vathi wira oone Erimu. Nto Owo okilanthe iwe, Osulu. Vano niitho Nawe ninniweha ephera, ni koosuwela wira Owo onniweha hiyo. Owo onniweha.

116 Nto vaava va okathi yoola w'epiphi, ikereja sothene sikenly'aya mmitthokiheryoni suulupale, ni aakhalana etthokiheryo *ela* ni etthokiheryo *ele*, sothene sootthokihwiwa ntoko ikereja sikina siry'aya, miromolelo. Nto exeeni yiireiye? Okathi w'epiphi, atthu oosareya erooho vekeekhai aniiokoh'aya, "Exeeni enrowa wiiraneya? Nkaaweheni an'aka!" Mulopwana oniira, "Nkaaweheni amwaar'aka! Nkawehani *ila!*"

117 Nto awo anoohiya Ettiminku, ahiiso muthukumano wa mavekelo wa Namararu ohiyu, yaakuvaka, wira erowe omoona *Hiyo Ninnimphenta Sucey*, wala etthu ntoko yeoyo, mutelevisawuni. "Anamaphenta olumwenku, ovikana opathana ni Muluku." Yiraka ntoko yaawo.

118 Miyo kaahimuleela muthiyana mmosa nihiku nlo, owo aawanre vootiteya muvistiituni mwawe. Miyo khwira, "Munna, evistiitu iyo khereere otita. Khino kahi yooreera miyo wooleelani, masi t'ery'aya. Nyuwo mwa muKristu, ni mwaamukhala nluku nookwattula."

119 Owo khwira, "Ahe, Munna Branham, moosuwela?" Owo khwira, "Ola ti muthinto mmosa paahi onipakiwa."

120 Miyo khwira, "Nlelo sinnitumihiwa ikuwo sootthanvwa, ni aakhalana maakina oottotha. Khanikhanle hata ntthyawelo." Ayo.

<sup>121</sup> Nwiriyaane, mukihye kooleleni etthu, mpatthani aka oophentiwa. Kihooopwapwelakani. Nnari, mulopwana. Kintthuna woohuluxani ohaaxiwa. Erooho eyo yaakhalakaru mwa nyuwo, munoorowa wira eyo. Eyo ekeekhai. Muhaana oyariwa wira mukhume mwa yeeyo. Vano nyuwo mwiireke entthun'anyu wa moonelo owo, masi mukihye kooleleni etthu emosa, moone, "Ele ekhanle murim'anyu, ti vaavo vari muhakhu anyu nave."

<sup>122</sup> Mukihye kooleleni. Nyuwo pooti okhala oolokaxa ntoko ekhokowa w'aiy'anyu, ni nyuwo pooti okhala oolokaxa ntoko ekhokowa, mwaaruusi, wa mposi anyu, masi nihiku nimosa Muluku onoorowa owaakhulihani mwaha w'oraruwa. Munootheka mwaawaraka siiso. Yesu ohimye wira, "Ole onimuweha muthiyana amuwereihaka murima, oomala oraruwana vamurimani vawe." Nto okathi mulopwan'owo orin'awe waakhula, natampi uwo, mwaha wo woowehani, mwaha w'oraruwa, t'ani iisonihenrye wa yoowo? Muupuwele yeeyo. Nyuwo athiyana aPentekosite, wuuliha muru! Munnona? Wuuliha muru!

<sup>123</sup> Miyo kinnoophentani, tivo kinihimyaka yeeyo. Ophenta ti woottharuxa.

<sup>124</sup> Hiyo nri mw'eloloni yuulupale, mw'eloloni yuulupale ya owara. Enkhala paahi ntoko, ni mihapo ntoko, olumwenku. Owo ohimye wira, "Muhiphenteke olumwenku, nnakhala itthu sa molumwenkuni; mwaairaka siiso, ophenta wa Muluku hata khokhanle mwa nyuwo," Nkincala mootaxeeni munlavul'anyu ilavulelo, otupha nno ni nno, wiina; mmetthaka maihi, muwaraka ikuwo ntoko seiyo. Nyuwo mulopwana munootthuniherya eyo. Mihokorokho sanyu sinnoohimeeryani vary'anyu. Eyo ekeekhai voolikana. Khivanxankiha hiyo okhala mw'evitikavitika ntoko siry'ahu, ni ittheke sa komunismu, ittheke sa onammukerejani, ittheke sa mutthenkeso ekumeniku!

<sup>125</sup> Owo o—owo okathi w'otakanxana, okathi wo wiiraaniha. Miiraano sinimwiiraaniha muteko, sinyakulihanaka mwaha wa yoowo. Ilapo sookhalana na—Wiiraana wa Ilapo, iyo sinimwiiraana. Ikereja sinimwiiraana vamosa. Yothene eyo enooniheryani? Eyo enooniherya wira Kristu ni Mwaakameliwa ahanle wiiraana. Ti yeeyo enihimy'aya. Iruku iya sothene sa itthu sinooniherya ele y'akeekhai enrwa. Nwehe vano nimalihaka, 'okhala wira kinoopisa.

<sup>126</sup> Nto vano nwehe, okathi yoole muulupale miroromelo sothene saamanly'aya, sa ovuluwa, awo yaahimoona Mutthu mmosa arwaaka, eettaka vasulu va maasi, aattamelaka. Nto etthu ene, nipuro n'oxankiha, nwiriyaane oratteene, etthu ene emosa yaawerya waakhaliherya, awo yaamoova. Awo khwira,

“Onkhala ntoko munepa. Siiso okhanle-ene, moosuwela, munepa.”

<sup>127</sup> Vakhala wira eyo khekhumelenle-tho! Atthu animoova Yeeyo. Awo anoova ehako, animoova muthinto mmosa w’owerya wa xetwani; Yesu ahimya-ene wira yaamurowa wiiraneya Yeeyo mahiku ala. Etthu ene emosa enwerya waakhaliherya ti Yesu Kristu. Kahi muromolelo mukina, hata sothene saya siitakanxale-ene vamosa; eyo enrowa okhaliha yootepa sihinakhalek’aya. Etthu ene emosa paahi enwerya wookhaliheryani ti Yesu Kristu.

<sup>128</sup> Nto Owo olaihenrye-ene otthika mahiku ookiserya, mwa mukhalelo yoola, ni wira yeela, ahimya (siiso ntoko mwaana oolaiheriya ahinatthi omuhokolowela Abrahamu, osuulu woopacerya) osuulu w’omwene wa Abrahamu, Yesu aamurowa . . . ohimye wira waamoono etthu emosaru. Mwaana oolaiheriwa ahinatthi, Muluku aamurowa wiisooniherya Mmansawe mw’erutthuni ni wira siiso ntoko Yesu siiraly’awe, ntoko Owo saahimaly’awe wira aamwiira, siiso ntoko saahimaly’awe wira yaamwiiriwa mahiku ookiserya. Nto va anatiri ale othene, vaakhanly’ahu owooniheryaka, ituusiya sene, vaava va ooholo wanyu, wira ela ehaana wiiraneya.

<sup>129</sup> Nto ikereja, saathuneya wookola miyoono, wira yaakhele Yeeyo, “Miyu kinnoova vakhani Yeeyo. Eyo kahi ya nikhuru nahu, moone.” Nto awo anootuthuwa Yeeyo. Etthu emosa ene paahi enwerya waaruuha wa Kristu, ti Kristu Mwaneene, nto awo animoova Eyo okhala yoowoopiha. “Oh, nkinsuwela. Eyo pooti okhala ya minepa, moone. Ni nkinsuwela ya Yeeyo.” Anoova etthu ene yeeyo enwerya waakhaliherya.

<sup>130</sup> Nto okathi yoowo w’epiphi wooriipiha murima, ale oothanliwa a mukereja, nikhuru nlo nikilanthi vale, anoova wira pooti okhala yoowoopiha, khandthuna okhala nnaata n’iyo. Vano naahirwa Nsu nle noosivela, “Muhoove. Ti Miyu.”

<sup>131</sup> Owo ti Masu. Kahiyo? Owo khanrukunuwa, okhala Masu. Vano, khamunwerya wiiwa Masu ohiy’ula, yiiraka, “Owo mmosaru nsana, olelo, ni mahiku othene. Muhoove; ti Miyu?”

Nuurame miru sahu.

<sup>132</sup> Tithi a Wirimu, ma—makaaripi ti wooviha. Okathi ti wooriipela, moota Mooro okhumaly’aya waltaari. Nyuwo munthuka mihupu mmatta. Nyuwo muhimye wira, “Omwene ori ntoko mutthu aakunxe ntthavi khurowa opahari, khurihela mmaasini, nto okathi opurulenly’awe ota. Omwene waari siiso.” Pwiya Muluku, nihiku nlo ehopa ele yookiserya eri mmaasini mmo! Nyuwo muhimye wira, “Saahiphwanyiwa sa khula muthinto.” Ntthavi nlo na Ehapari yooreera ninnivara khula muthinto; nihaavara akhapa, mwiikhampa, aranttaasi, inowa, ihopa sookhuura enama. Hiyo khaninsuwela etthu ninvar’aya, masi saahikhala ihopa kamosa-kamosa

Nyuwo mwaaphavel'anyu. Nyuwo mwa Ole okhanle Mphuki. Masi ninnisuwela wira, naanaanoru khapa, mwiikhampa, ni sothene, saahitthikela-tho mmuttuphani mwa marove, saahitthikela mmaasini. Masi nihiku nimosa ehop'ele yookiserya yathokiheriwe, yaathomeliwe orwa, mpantt'ole wookiserya w'Erutthu, onookumihiwa vantthiyani vale.

<sup>133</sup> Nyuwo mwaahiriha ntthavi mahiku a Lutero, ni Wesley, Alexander Campbell, John Smith, Kalvino, Knox, Finney, Sankey, n'akina; okathi wa Pentekosite, mahiku a F. F. Bosworth, ni Frochman, axilopwan'ale aalupale. Nyuwo mwaahiriha matthavi, mahiku a Billy Sunday, moovirani w'okathi.

<sup>134</sup> Nto vano Nyuwo nlelo munootholathola mpahari. Ookhala mmosa w'ale akilanthe va ohiy'ula, Pwiya? Aakhanle-ene, ekhale ntoko muthiyany'ole mwaamukhaani veehimeni. Hata mwa mukhalelo awe w'enamuttompe, owo nlelo aahisuwela wira Nyuwo mwaari Mesiya. Owo aahoonu ethoonyeryo. Yaari yeeyo. Owo khwira, "Kinoona wira Nyuwo mwa profeta." Owo khuupuwelela wira vaamuweryaneya okhala Mesiya. Owo khwira, "Hiyo nimmuwehererya Mesiya," mwa moolumo makina. "Hiyo noosuwela wira Mesiya arwa vale, Owo onoonihimeerya itthu iya." Vano Nyuwo khwira, "Miyo ka Yoowo." Yaari yeeyo.

<sup>135</sup> Vano, ohiy'ula, Pwiya, mwaahiye awo yoone yeeyo, "Ti Miyo; muhoove. Ti natiri Aka." Mwaavonihe aretta, Pwiya, nwoopole ale arimeenle, mwaasarihe ale oohikhal'etthu.

<sup>136</sup> Wira nikhume ohiy'ula, ni nihimye mmurimani mwahu, okathi onikhum'ahu, ntoko ale yaakhumme Emawusi, "Khinoona murim'ahu oniviha mwa hiyo Owo anilaleeryaka ohiy'ula mpaani, Mukhalelo Awe w'eMuluku!" Moota yaasuwelans'aya wira mwaari Nyuwo, awo yaahoolattulani wira nvolowe vano maitho aya khutthukuwa. Khula mmosa a hiyo, ohiy'ula, onnoolattulani wira Nyuwo nvolowe. Hiyo naahisuweleke saana, noolattuleni Nyuwo wira nvolowe, khula enamuna. Eyo t'inamuna emosa paahi Nyuwo mukhanly'anyu wiisuupulula Mmansinyu.

<sup>137</sup> Nto hiyo ninnoona moota Nyuwo mwiisooniheny'anyu vamanly'anyu ohihimuwa, Nyuwo mwaahira etthu mwa enamuna emosaru Nyuwo mwiiraly'anyu muhinatthi okhomeliwa. Vano murwe ohiy'ula, Pwiya, Nyuwo moohimya wira Nyuwo mwa "mmosaru nsana, olelo, ni mahiku othene." Muniirele-tho, hiyo, ntoko Nyuwo siiraly'anyu mahiku mwaary'anyu va mw'erutthuni, elapo ya vathi. Ninoorowa owaani, nitthapaka vamurimani, ntoko ale. Mwa Nsina na Yesu hiyo ninnivekela. Amen.

138 Vano mwa muteko, ohiy'ula, koosuwela wira khivareere oviha, ni nirina minuutu miloko miili wira nikhume m'okathi. [Nipuro vahiitthu mufiitani—Mol.] Miyo ki . . .

139 Nkikhanle omaaliha wala okhottiherya itthu siniir'aka. Miyo kineettihiwa ni Etthu, kweekwe kinikhal'aka, makhalelo aka othene, ni Eyo kweekwe ti y'ekeekhai. Khenakileeleke etthu ehikhanle wira eri mBibiliani. Nkikhanle omaaliha. Nkikhanle wira het'etthu wa yeeyo. Eyo enimwiira paahi, khula enamuna. Ni kookupali wira, kakhalaru oowiiwelela, ookhala mutthu omphavela. Ni miyo kinookhala oororomeleya. Nto Nihiku nlo, kintthuna, ntoko sihimaly'awe Paulo Oowaarya muulupale, "Khiivo ephome ya mutthu eri mmatatani mwaka." Huh-uh. Ki—kintthuna kooleleni Ekeekhai. Kahi wira miyo ka . . . Miyo kinnoophentani.

140 Nto mwaakhalanne mwammiravo . . . Vano muupuwele yeeyo, muthiyana, nyuwo koopwapwenly'akani okathi vakhani ovinre, nyuwo axinna athiyana mmetthale maihi n'ithu. Miyo ka . . . Mwaakhalanne mwammiravo okilanthi-ene muramphani, vano nyuwo khwira, "Junior, oophentiwa, vanreerela nvolowe, oophentiwa. Pooti okhala, nkisuwenle, alakela munoophitiwa." Nyuwo khimuniphenta mwaan'owo. Ti yeeyo. Munoorowa vale mwapere esapal'awe, wala onvoloiha. Ti yeeyo. Munnimphenta.

141 Ti siiso Ehapari yooreera ery'aya. Muluku onnoophentani. "Nto ale Owo onaaphent'awe, Owo onnimuttharuxa ni onnimupwapwela khula mwaana onoorwa wa Yoowo." Mwaahiweyeke ovilela nttharuxo, mwaakhumaka munakhala oonanariwa mwaha wa yeeyo, weso mw'ana oophwanyiwa, khamuhiyo aana a Muluku. Vano muupuwele paahi, eyo ti Yoolempwa.

142 Vano nuulumo nimosa ninkhuma wa Yoowo, nuulumo nimosa, ninnihimya vanci-ene ovikana kaarow'aka ohimya, ikumi imilyawu. Ti Yoowo. Hiyo ninnimusuwela natiri Awe. Hiyo ninnisuwela etthu Owo olaihenry'awe wira. Vano nkisuwenle sinto . . . noo . . . ninrowa opacerya e . . .

143 Owo ookawa-tho ittikitti sa mavekelo? Mookawa ittikitti olelo? Yaari exeeni? J, vaareera. Vaareera, wira nikhhalane okathi, nrowe nipacerye nummaru n'emoso. Vano, alakela ari mapuro othene mpaani. J, nummaru n'emoso.

144 Nto vano nookhalana omwaramwareya. Hiyo nipacenrye, okathi mmosa, okhuma *ela*, mwa okathi, orowa nno orowa iwe, ni mapuro othene, masi nookhalana omwaramwareya nno. Masi atthu othene ankela, khula nihiku, aakhalana okathi w'ovira muliinyani. Eyo khenihimya wira mwaha wo wira muri vaava . . .

145 Akavi ansuwela, muthukuman'ola, aakhala oophiyaka eyaattelo vanli avonihawe vamuthukumanoni, ntoko yaavonihawe va? Vekeekhai, moosuwela. Moone, ettikitti ya



mavekelo eri wira yaaruhe atthu vasulu va, oruuha Eroho Yowarya eriyari aya, siiso ntoko nilimalenly'ahu wira yeeyo. Khivantthuneya hiyo okhalana yeeyo naanaano va. Pooti ohiya ittikitti sa mavekelo.

<sup>146</sup> Siiso ntoko siiraly'ahu nsana ohiyu, khanaarina ittikitti sa mavekelo nsana ohiyu. Eroho Yowarya yaahikela eriyari y'ale yahaarina ittikitti sa mavekelo. Ni kaahoona itthu sinci-ene kahaahimaly'aka hat'etthu sa seiyo, 'okhala wira nkaasuwenle sinto saari siiso wala nnari. Nlelo waanikhala oriipela mwa yaawo, vano miyo khuhiya paahi. Nkaasuwenle. Khivaarowa ophwanyiha etthu owiihana. Etthu p'itthu Eyo enihimy'aya ti y'ekeekhai, vano mwiiweke ele Eyo enihimy'aya.

<sup>147</sup> Vano muhimmye wira ele yaari J? J, nummaru n'emoso. J, nummaru n'emoso, ole orina ettikitti ya mavekelo, avenxe ntata. Pooti muvonyale-ene, mwan'aka; siiso ekhanle-ene e. . . Oh, kileveleliwe. Oh, ottuli saana waattamela exiri ottuli. Murwe vasulu va, muhano. Awo—awo aniruuha ittikitti iya paahi naanaano, mmiravo, Munna Borders wala Billy, mmosa, imaara sikina oowaili aya, anootakanxa ittikitti iyo ohoolo wanyu, ni woovahani ettikitti anyu, ntoko sintthun'anyu. Hiyo khaninsuwela, awo paahi. . . *Ola* pooti waakhela nummaru na thanu, nto *ole* waakhela nummaru na thanu na piili, *ola* waakhela nummaru muloko ni thanu, ni *ole* miloko mithanu na mixexe ni thanu, nto hiyo khaninsuwela. Vano nto, emaara ekina, kaarwaaka, miyo paahi, khula enkhala vamurimani vaka, kiniihana opacerya vaavo, hata wira eri vayi. Miyo paahi. . . Kahimya wira. . . Imaara sikina kinoowaalaka akavi athatanne, ni waakawanya ale ari eliinya ela n'ukhalana waakhula. Munnona? Vano nto, kaahiire, vano, miyo paahi. . . ele enikirweela mmuruni voopacerya, kinimwiihana.

<sup>148</sup> Nummaru n'emoso. J, nummaru na piili. Nummaru na piili, nummaru na tthaaru, nummaru na xexe, nummaru na thanu, nummaru na thanu na mosa, thanu na piili, thanu na tthaaru, thanu na xexe, muloko, erwe, moone. Emosa, piili, tthaaru, xexe, thanu, thanu na mosa, thanu na piili, thanu na tthaaru, thanu na xexe, muloko. Ti yooreera. Ti siiso, murwe. . . Mulipelele, mmosa oronwe epantte ekina. Miyo kaari. . . Emosa, piili, tthaaru, xexe, thanu, thanu na mosa, thanu na piili, thanu na tthaaru, thanu na xexe. Ti yeeyo. Vano, va, ela va, muloko. Vaareera.

<sup>149</sup> Muloko n'imoso, muloko ni piili, muloko ni tthaaru, muloko ni xexe, muloko ni thanu. Awo athanu akina. Emosa, piili, tthaaru, xexe, thanu. Vaareera, ti yooreera.

<sup>150</sup> Muloko ni thanu na mosa, muloko ni thanu na piili, muloko ni thanu na tthaaru, muloko ni thanu na xexe, miloko miili. Emosa, piili, tthaaru, xexe. Kiniwoona axexe paahi. Miloko miili, miloko miili ohaakhula? Vaareera. Vano, khaninthuna oweemeliha anci-ene emaara emosa. Vano naamaliharuru

ala, nlelo khivanaile saana, ninoowiihana akina-tho. Hiyo khaniniihana. . . Khino hiyo. . .

<sup>151</sup> Nrowe neehererye-tho sikina vakhani. Nrowe neehererye thanu sikina. Miloko miili n'emoso mpakha miloko miili ni thanu, mwa iJ, evenye xontte. Miloko miili n'emoso mpakha miloko miili ni thanu. Emosa, piili, tthaaru, ottuli iwe saana, xexe. Emosa, piili, tthaaru, xexe, eyo thanu. Vaareera, vano nrowe neemele vaavo paahi. Aakhala miloko miili n'athanu muliinyani, ni awo—awo anoothataana va.

<sup>152</sup> Vano kinrowa woovekelani xontte. Mwaamukivaha yothene anyu. . . Munwiryane Muluku voomalela, minuutu muloko ni mithanu, muloko ni mithanu na mosa sinttharelana. Munimwiira yeeyo? Nto munimwiira ela, otthukula murim'anyu? Vano muupuwele etthu kihimaly'aka. Muhihiye omorela ottuli wanyu, ntoko maasi ammorela ottuli wa nrattha, ntoko yoohimya ya khalayi. Muhiire yeeyo. Muttittimihe Ela.

<sup>153</sup> Kooleelani etthu ehikhanle mwa Yoolempwa, ni natiri a okathi, muhaana omuphwanya mulipa-ookhapelela va khurwa okileela yeeyo. Ti yeeyo. Miyo—nkiniixuttiha etthu ehikhanle eri muhina mwa Masu. Ni kaakhalaka oratteene ni Masu awo, ni kaahimya Yaawo siiso, vano Muluku. . . Eri mBibiliani. Nlaikha n'Apwiya naakihimenrye-ru etthu ehikhanle mBibiliani, khinaarowa okhala Nlaikha n'Apwiya. Ti yeeyo. Nlo khinnakileleke hata emaara emosa etthu woohikhala ele eri muhina mwa Masu, ni nyuwo munnikikhalela anamoona. Nlo khinnahimyeke etthu emosa, mwa ikonto n'ikonto imiya, ni mattaava a molumwenkuni, Nlo khinnatoko ohimya etthu yoovonyeya, wala ohimya etthu yahiiraneiyeye.

<sup>154</sup> Nwiryane. Munkohe mulipa-ookhapelela n'akina va. Ela munoon'anyu va, ti epantte yaamukhaani. Eyo ekeekhaii, axinna? [Axinna aniira, "Ekeekhai."—Mol.] Vano, ota iwo, ni iwo mwa makhalelo oomeekha, Nlo nihimiy'aya, "Murowe nipuro *nla*, moone *ela*. Ni *ela* enimwiiraneya. Ni muhimye *ela* va, *nno*." Ti voohihererya, okathi wothene, moone, eyaakha ti eyaakha. Atthu vamuthukumanoni anoona paahi i—ithu sikhani. Masi vano mwakhalaru oottittimiha.

<sup>155</sup> Vano atthu othene muliinyani mu mwa mavekelo, yeemenle va, amalapo wa miyo? Nvenxe matata mwakhala vale. Vaareera. Akavi ari iwo, anuwela wira nkinsuwela hat'etthu ya nyuwo? Nvenxe ntata. Vano okathi. . . Kooxukhuru. Nkincala vatthu xeeni mury'anyu, mwakhala osulu mupalkawu, ottuli vakhiviru v'exiri, vaava *va*, khula nipuro mury'anyu. Kinrowa o. . .

<sup>156</sup> Vano, ela ti ya mureerelo anyu. Ela ti ya feita anyu. Moone, ela ti ya feita anyu.

<sup>157</sup> Koono wira ole aari musulu aka aalavula ni miyo nto, masi khaari yoowo. Kookhalana mwaamusulu aka mu nipuro nlo, ohiy'ula, munnuwelo awe woophiyaka saale, ni koono

wira aari Paulo mwaamukhaani. Owo kweekwe aahimya wira aarowa orwa, eemele vaplataforma, akilaleerye, ni owo khorina hata iyaakha piili. Kinoona wira mwammirav'owo oniwaavya ame awe.

<sup>158</sup> Tivo muupuwele, kintthuna wookhaliheryani. Miyo... Muluku oosuwela yeeyo. Miyo kintthuna wookhaliheryani, moone. Vano nwehe, kintthuna wira mphwanye sooreera, Owo arwa eriyari ahu.

<sup>159</sup> Vano muupuwele yeeyo, oMutthu wa Yesu Kristu ovaraka muteko mw'erutthuni, ntoko Owo saahimaly'awe wira aamwiira vookiserya. Akavi answela wira Owo aahihimya yeeyo? Siiso ntoko yaary'aya wu oSotoma, okathi Nlaikha naarukununwe ettuli Aya, nto e...Ole aari Muluku. Munnaamini wira ole aari Muluku? Akavi anaamini wira ole aari Muluku? ["Amen."] Vekeekhai, aari yoowo. Bibilia ohimye wira aari yoowo. Ni Owo, Yesu, aahihimya yeeyo. Vano nwehe.

<sup>160</sup> Vano nyuwo iwo muhirina ettikitti ya mavekelo, kintthuna mukiirele etthu, khula nipuro vary'anyu. Vano muupuwele, itthu iya, nwehe saana okathi Eyo enoohimeery'ayani wira moovonihwi, wala etthu Eyo enoohimeery'ayani wira mwiire. Nwehe saana etthu Eyo enihimya'aya. Eyo yoohimeeryani-ru paahi, eri wira elipiherye waamini wanyu. Vano nto waamini wanyu waphiyerya nipuro, nyuwo munimookola moonoo mmukupali Muluku. Nkihiyo miyo, 'okhala wira Atithi a Wirimu annisuwela.

<sup>161</sup> Miyo kinweha eliinya ela nno, nkinimoona hata mutthu onimusuwel'aka. Nkiniwoona woohikhala atthu aili wala araru vamuthukumanoni vothene, kinaasuwel'aka. Ni nkisuwenle, naanaano va, kikhanly'aka wira, omoonihwa mmosa. Koosuwela wira Edmund Way aari vaava minuutu vakhani sivinre. Koono wira kaahimoona, nto nki—nkimuwenhe... .

<sup>162</sup> Kaahivonye vale, kinnimoona mutthu onimusuwel'aka, mulopwana mmosa n'amwaar'awe, ni mwanamwane mmosa muthiyana, onihaniwa Fritzing, onikhuma Ohio. Ti yoowo, nyuwo mwa munna—Munna Fritzing? Nyuwo mukilante ntoko vanlothoni vo naamukhaani vaavo... .Awo ti Munna mulopwana ni Muthiyana Fritzing, a Ohio, apatthani aka.

<sup>163</sup> Nto ohiya yeeyo, okilante ottuli, ookhala mu... .Kinnoona epantt'ela nno, ookhala mulopwana mmosa mutokweene orina iyaakha soophiyaka miloko mithanu na mixexe ni piili, onihaniwa William Dauch. Owo n'amwaar'awe. Awo anfurumeera. William Dauch, Ohio, mpatthani aka a muhina. Woohikhala khalayi, owo aarina, iyaakha miloko mithanu na mixexe ni emosa, aahikhalana ovonya wa murima, etuthuwelo ya murima, nto amwaar'awe khukiihana, wira kirwe naanaanoru, owo aamookhwa okathi ene yoowo. Nto va... .

164 Owo khonreere okhala mpatthani aka a muhina. Kirowaka omoona, kaahixanka. Nto miyo khweemela, nto roota naka nimosa khinaari saana, naamuthikila epenewu aka kapatti-kapatti, nto miyo khurowa vastasawu emosa y'oTexaco, khuthuma ekaaxi, nto awo khukhuma, khuweha. Vano miyo khuweha osulu, kimoona Munna Dauch eettaka mukereja mwaka, attikinyaka ntata naka. Miyo khwira, "Attottopeliwe Apwiya." Nto miyo khuweha ottuli epantt'ela, nto va owo aarwa eettaka muramphani, nto khukivaha mukhono. Miyo khurowa omoona.

165 Kimoona meetiku awe, mmiravo mmosa muYuta, ahiiso mulopwana mmosa a munnuwelo w'eriyari, mulopwana muYuta. Nto miyo khwira, "Munikileelani ya mulopwan'ola, meetiku?"

166 Khwira, "Owo khorina hata oreeriwa." Khwira, "Owo ori vathi v'eheema y'epheyo." Khwira, "Owo onimookhwa memme." Owo khwira, "Muupuwele, owo orina iyaakha miloko mithanu na mixexe ni emosa."

Miyo khwira, "Ayo, mulopwana."

167 Khwira, "Murima oroovonya voomalela. Khiivo enweryaneya wiiriwa." Khwira, "Okathi awe w'orowa."

168 Nto miyo khwira, "Ayo, mulopwana. Masi, nnari, owo khonrowa. Ti yeeyo tu."

169 Miyo kivolowa, kihela ntata naka vathi v'eheema. Miyo khwira, "Munna Dauch, munniwerya okiiwa?" Owo khukiweha. Vano vekeekhai, mwa nsina nawe, owo t'a wAlemaanya, D-a-u-g-h, ni miyo kinromola Dauch, moone. Nto miyo—miyo kihela ntata naka vathi v'eheema, nto miyo khwira, "Munnikiiwa, Munna Dauch?"

Owo khwira, "Ayo."

Miyo khwira, "Khamunrowa. Miyo kihoona wira khamunrowa."

170 Esumana emosa okhuma vaavo, keemenle-ene mukereja mwaka, t'ani aavolonwe eettaka mukereja woohikhala Munna Dauch! Miyo khukhuma vamuthukumanoni khurowa omuro, mukafeteriyya, wira kalye. Nto vakhumaly'aka mukaaroni, kaamweetta muramphani, va khurwa Munna Dauch ookonle-ene ntata nawe. Soowoona iyo khasinivonyeya.

171 Nto mulopwan'ole a iyaakha miloko mithanu na mixexe n'emosa, ni onnikhala khula muthukumano, aari oCalifornia. Nkavenxani ntata nanyu, Munna Dauch, mukilantho vo, wira athu yoone wira mwa nakhotto muulupale vano. Va, okilantho vaava va, moone, iyaakha miloko mithanu na mixexe n'emosa, ni onnikhala va khula muthukumano. Kakhala otapernakulu, owo onneettiha imiilya imiya sene khula nihiku, wira akiiwe kilaleyaka mutthaka mukhaani, n'utthika. Muluku, "Onookhala Waarya okathi wa makaaripi."

172 Miyo kaahiira, nihiku nimosa kilavulaka ni yoowo, miyo khwira, “Kiwiireleni exeeni, Munna Dauch?”

173 “Yoovekela emosa paahi, Munna Branham. Owo arwa vale, kintthuna kirowe ni Yoowo.”

174 Khwira, “Muhixanke. Eyo yoolipihiriwa. Vekeekhai.” Vano, mulopwan’owo khuvolowa, khupatisiwa, oh, khuvolowa khwaakhela opatiiso wa Eroho Yowarya ni sothene, murumeyi ooreerexa a Kristu.

175 Vano kinrowa waavekela atthu othene, mukhale oottittimiha saana, nweheke epant’ela ni nvekele.

176 Vano anamasomiha akavi va ansuwela wira Owo ti Namukuttho Muulupale, naanaano va, onwerya onimorela ikharari mwaha woottettheya wahu? Ahe, vakhala wira Owo mmosaru nsana, olelo, ni mahiku othene, ni Namukuttho Muulupale mmosaru, Owo aamwiira vamosaru. Paahi, Owo, Erutthu Awe eri ve. . .vEhiceni va Muluku. Akavi ansuwela yeeyo? [“Amen.”] Erutthu ya Yesu eri vEhiceni va Muluku. Masi Owo onrumeela erutthu ahu wira aisooniherye Mmansawe, siiso ntoko Owo aahimaly’awe wira. “Miteko sinvar’aka nyuwo munoovara nave.”

Kinrowa woovekelani wira mukhale oomaala, mukhale oottittimiha, nwehe saana, nvekele.

177 Vano, Tithi a Wirimu, miyo kihilipiha wira kikhale ootiittimiha ntoko sinsuwel’aka moota wo wira, yeeyo. Vano nuulumo nimosa paahi ninkhuma wa Nyuwo, Pwiya, vano nto Nsu nle, noomaaleleya naamukhaani nikhuruwele muthukuman’ola niire, “Ti Miyo; muhoove.” Munivahe, Tithi. Nto miyo kinniivahererya wa Nyuwo, ni Mutthakha kilalenry’aka ohiy’ula, ni Masu Anyu wira elipihiriwe. Nyuwo khamurina wira. Masi Nyuwo mwairaka vale, wala mwaira, okhala wira Nyuwo mwaahihimya. Miyo kinvekela wira munivahe yeela, mwa Nsina na Yesu. Amen.

178 Nto atthu othene ekhale oottittimiha saana, ootiittimiha saana tu. Ehaali anyu? Vano kinrowa woovahani Yolempwa okathi onivir’ahu. Vakhala wira Apwiya animwiira, miyo nkisuwenle. Masi pa-. . .Ni miyo kinikhala kilaleyaka siiso, moone, owo muthinto mmosa wa mureeriho. Ola muthinto mukina wa mureeriho. Ele yaari eparakha paahi. Ela, etthu emosa paahi, enikumihia ekumi mwa nyuwo paahi.

179 Vano muhan’ola eemenle va. Miyo nkinamooneke kookhalaru. Hiyo khaninsuwelana? Kookupali wira moohimya, okathi vakhani ovinre, wira nkoosuwelani. Muluku onnoosuwelani. Owo onnikisuwela. Moosuwela wira ele neemelenly’ahu va vano, ninrowa okhala oowaakhula Nihiku n’Olamuliwa? [Munna muthiyana oniira, “Amen.”—Mol.] Moosuwela yeeyo? Moosuwela wira etthu eniir’ahu vano, Muluku onoorowa onaakhuliha osulu iwe? Miyo kihimenrye eyo

mwaha wa niwoko paahi. Vano, Apwiya Yesu yakuupululela-ru etthu muniir'anyu, etthu eri mmuruni mwanyu, wala etthu ntoko yeeyo, mwaamwaamini? Nyuwo mwaahaana waamini yeeyo, khamwaamini? ["Amen."]

<sup>180</sup> Nyuwo iwo mwaamwaamini, nyuwo muthukumano?

<sup>181</sup> Vano nimphwanyaneya siisaale ntoko muthiyana veehimeni, ni Pwiya'ahu, mulopwana ni muthiyana ankumana emaara yoopacerya. Munnona? Hiyo nri va, ninkumana mwaha wa...Owo ti Yohani Oowaarya kapiitulu 4. Vano Eroho Yowarya yahimya wira...Vakhala wira muri va mwaha wa mutthu mukina, mwaawereiwaka, wakhala mukattyamiho wa vatthokoni, wakhala mikattyamiho sa musurukhu, khul'etthu, miyo nkiyuwenle. Masi Awo annisuwela. Masi Awo anniwerya olamula miyuupuwelo siri mmurimani mwanyu. Awo ti Masu. Miyo nkinwerya. Miyo ka mutthu. Nyuwo munrimuukhuleya vakhani paahi, nto mwaha wa yeeyo miyo kiniir'aka yeela, moone.

<sup>182</sup> Owo ti mmosa wa mikattyamiho sanyu, wuukhuleya. Ti yeeyo. Nave-tho mookhalana tiyapeeti, eyo etthu ekina ehilonke. Ti yeeyo. Mikattyamiho, itthu sinci-ene sivonyeiye. Eyo ekeekhaii? Yakhala ekeekhai, nvenxe ntata. Munnona? Munnaamini wira Awo animoovonihani? [Munna muthiyana oniira, "Ayo kinnaamini."—Mol.] Munnaamini? Vano, wuukhuleya wanyu onipacerya mwaha wo wunnuwa wanyu, moone, masi vano yothene eyo enimoohiyani. Ni kinnaamini wira mwaha wo waamini ninoorowa oKalvario, mwahelilewiwe Ephome.

<sup>183</sup> Vano, ti yeeyo Owo iiraly'awe. Owo aamuhimenrye muthiyana veehimeni ole waari mukattyamiho awe. Wawawe waari waatta alopwana. Wawinyu waari...Kinoona wira waari wuukhuleya, ni itthu piili wala tthaaru sikina sihilonke. Eyo ekeekhaii, kehiyo? Eyo etthu emosaru.

<sup>184</sup> Vano, Owo varwiiy'awe wa Simoni, aahimuleela ole aary'awe. Munnaamini wira Muluku onniwerya okileela nsina nanyu? Yaamurowa owaaminihani-tho? Yaamurowa? Muhano Strong...[Munna oniira, "Stout."—Mol.] Stout, mwaamwaamini? Rowakani mwaaminiki, nto nyuwo... Yoomala. Amen.

<sup>185</sup> Murwe. Munnaamini? Ni miyo ka mmalapo wa nyuwo. Nkinoosuwelani. Muluku onnoosuwelani. Munnaamini wira Owo onniwerya okuupululela ole ori mukattyamiho anyu? Owo akuupululela vale, vano Apwiya Muluku attotopeliwe. Eyo ekeekhaii? [Munna oniira, "Ayo, ekeekhaii."—Mol.] Vano muhi—muhikhale ooxanka, moone, awo—awo ti Yaawo, tivo munoon'anyu yeeyo. Vaareera. Munihaaxeya-tho mwaha wo wuukhuleya, wuukhuleya mmuupuweloni, ni onooaaxani vookhweya-vo. Ni munihaaxeya mwaha wa mukattyamiho

w'eyoso, etthu evonyoie ni hapa, ni mookhalana othoiwa ephome. Ti yeeyo. Mookhalana etthu. . .

<sup>186</sup> Ookhala mulopwana mmosa onkhala arwaaka va kweekwe. Munnaamini wira Muluku onniwerya woovonihani? [Munna muthiyana oniira, "Ayo, kinnaamini."—Mol.] Waa voniha aiy'anyu, nave, waakhaliha akumi? Munnuupuwela wira mukattiyamiho wa mmirimani onoomala, n'awo anookhala saana? Ti yeeyo enaahaaxa. Murowe mwawiixaatherye matata, mwaaleele siiso, nto oni—onimwaamala.

<sup>187</sup> Miyo ka mmalapo wa nyuwo. Pwiya Yesu onnini suwela hiyo oowaili, kahi siiso? Munnaamini wira Muluku onniwerya wookhalihani saana? Pwiya Yesu akuupululela vale etthu e. . . nyuwo mu. . . eri mmurimani mwanyu, nyuwo munnaamini wira Owo onimookhalihani saana? Munikhalanaka mukattiyamiho. Murina mu—mu—mukattiyamiho wa nawamwe, mwaha w'etthu emosa. Nto etthu ekina, ehiiriha eyoso anyu okhala ya nikhwatta, masi eyo t'ile meetiku anyu ohimaly'awe. Vano, etthu ekina t'ila, wira munthuna wooperariwa mwaha wa yeeyo. Eyo ekeekhahi volikana. Kahi ekeekhahi? Vano munnaamini wira Owo onniwerya okhootiherya yeeyo? Munnuupuwela wira waamini wanyu ori mwa Yoowo? Vano moosuwela wira nkihiyo miyo kiniira yeeyo. Munnaamini? Vaareera. Rowakani, nto siiso mwaaminni anyu, ekhale siiso wa nyuwo.

<sup>188</sup> Hiyo khaninsuwelana mmosa ni mukhw'awe, woona waka. Apwiya Muluku anninisuwela hiyo oowaili. Munnaamini wira Awo anniwerya okuupululela itthu saarowa wookhaliheryani? [Munna muthiyana oniira, "Ayo, koosuwela."—Mol.] Nyuwo, munnaamini wira Awo animwiira. ["Vekeekhai."] Miyo kinihimya. . . "Vekeekhai," eyo ti vooreera saana. Ti yoorera saana. Vano nyuwo khamureerane itthu sihikhanle saana, mikattiyamiho sinci-ene n'itthu siiso, ni ntoko okothomola, ni khamunwerya oxintta. Ni khamureere wuukhuleya. Nto—nto eyo, eyo ekeekhahi.

<sup>189</sup> Vano, mookhalana muritti vamurimani vanyu, nto muritti uwo mwaha wa mutthu, okhanle mwan'inyu mulopwana. Vano owo orina mu—mukattiyamiho, mikattiyamiho sa vatthokoni. Owo ni mwaar'awe, awo kweekwe animwaakhulana ni wira siiso. . . ? . . . Ni nyuwo khamureere oxenkereya mwaha wa yeeyo. Ti yeeyo. Vano mwaamini ni murim'anyu wothene, nto yothene enoolakihereya ni enoomalamala. Mwaamini vano. Apwiya yooreeriheni.

<sup>190</sup> Ehaali anyu, mulopwana? Miyo ka mmalapo wa nyuwo, ni—ni nyuwo mwa mmalapo wa miyo. Ni yo—yoopacerya. . . Soowoona vano, kinnoona, enkhala wira empa yothene enoomwalelelya, ntoko etthu enivilikeya. Munnona? Masi munnaamini wira Pwiya Yesu aamuwerya okuupululela etthu mweemeleny'anyu vo? Munnaamini wira Owo aamuupulula?

Miyo kinnaamini yeeyo, nave. Miyo kinlavula ni nyuwo, wira kikwannye erooho anyu, vekeekhai ti yeeyo eniirel'aka. Moone, miyo nkinoosuwelani, tivo ehaana okhala etthu voohikhala miyo kiniira. Miyo kihaana okhuma mwa miyo voomalela, wira Owo iire Mmansawe. Munniiwa?

<sup>191</sup> Vano, etthu emosa, munihaxeya ni wuukhuleya wootepa, nto mukhalelo yoola wo wuukhuleya ti w'okathi munci-ene. Eyo ekeekhai. Nto mukhalelo yoowo wo wuukhuleya woowiirihani okhalana ikuru s'ephome, nave. Ni mwaahiphwanya ecile. Ti yeeyo. Mwiiwe, nyuwo mwaari mulaleyi, ahiiso mwa mulaleyi. Vano nyuwo mwa mulaleyi; koowoonani mweemenle vapulpitu. Vano, mmwaamini Muluku, nto wuukhuleya iwo onimoomalani. Arumeyi othene aakhalana eyo. Munookhala saana. Mutthikele vapulpitu vanyu, mmwiiwelele Muluku mukhale oororomeleya ni Masu awo, Yesu Kristu.

<sup>192</sup> Munnaamini wira mukattyamiho wa muthana ohoohiyani, mukilante-ene vakhaterani? Munnaamini? [Munna muthiyana oniira, "Ayo."—Mol.] Vaareera, mulopwana, vano mutthikele murowaka, mwiiraka, "Kooxukhuru, Pwiya."

<sup>193</sup> Murwe, muhano. Ehaali anyu? Munnaamini wira ka murumeyi Awe? [Munna muthiyana oniira, "Vekeekhai kinnaamini."—Mol.] Vaareera. Munnaamini wira mukattyamih'owo w'athiyana, mukattyamiho w'athiyana, onoorowa woohiyani? ["Amen."] Munnaamini? Vano mukeleleke ohoolo, mwiire, "Kooxukhuru, Pwiya."

<sup>194</sup> Mukattyamiho wa esyo, mukattyamiho wa muthana, ottuli wanyu. Munnaamini wira Muluku onimoovonihani ni wookhalihani mukumi, yeeyo? Munnaamini wira Owo onimookhalihani mukumi? Vaareera, muroweke yawinyu...?...

<sup>195</sup> Murwe, muhano. Miyo ka mmalapo wa nyuwo. Kahooleelani hat'etthu, nnakhala, mwaamwaamini wira Mukhalelo wa Muluku ori vaava wira waavonihe aretta? [Munna muthiyana oniira, "Vekeekhai, kinnaamini."—Mol.] Mwaamwaamini? Ahe, mwaamini vale, eretta ya mmirimani. . . Miyo kaahooleelani, moone. Yo—yoorowa. Miyo kihooleelani, moone.

<sup>196</sup> Ehaali anyu, mulopwana? Muluku onkhala vamurimani. Nto murim'anyu ohoonihereya naanaano va, ohikhala saana. Munnaamini wira Owo onookhaliha saana? Rowakani nto mwaamini. Muluku ooreeriheni. Mwaamini; Owo onimookhalihani saana.

<sup>197</sup> Nyuwo murimuukhuleya, ohooruhelani eretta ya mmirimani, nikhwatta na mmirimani. Nlo ninnoohaaxani mmalakarula olya. Munnaamini wira yothene yoomala vano? Murowe mwaphavele etthu mulye.

<sup>198</sup> Enikhala yoolipa nyuwo weemela, muthana onnoohaaxani vootepaxa. [Muretta oniira, "Ayo, mulopwana."—Mol.]



Khunrowa-tho woohaaxani, mwaaminiru. Munimwaamini? ["Ayo, mulopwana."] Vaareera, rowakani, ni Apwiya Yesu yookhaliheni mukumi voomalela.

<sup>199</sup> Mukhalenleni oowuukhuleyaxa? Muroweke paahi, mwiire, "Nkinrowa-tho okhala oowuukhuleya," vano khamunrowa. Murowe mwaamini. Vaareera, mulopwana.

<sup>200</sup> Murwe, muhano. Vano, muthiyana a wEtiopia, ni mulopwana mukunya, vekeekhai yoolikana ntoko ni okumana nihiku nle, Yesu. Waahikhala ovalaanyana ntoko saakhalanak'ahu Okuusini, masi khanirina-tho. Yesu khwaasuwelihira wira athu othene yaari athu a Muluku. Khiyaakhanle hata evirikanelo, moone, hata wira aari muYuta wala muSamaria.


<sup>201</sup> Vano, Muluku aahookhaliheryeni, vahilokenle wiipiwa makhonyokhonyo onimoorakalihani. Masi munnaamini wira Owo onoorowa wookhaliheryani, ookhaliheni mukumi? Siiso ntoko muthiyana siiraly'awe, muroweke mwaaleele athu anyu itthu suulupale Muluku owiireny'aweni. Vaareera.

Vano, ookhala mulipa-owooperari olikanne wira avirihe mwaalo.

<sup>202</sup> Okathi vakhani paahi. Khaari muthiyan'ola. Vano, okathi vakhani paahi, athu othene ekhale oottittimiha vano. Ti—ti Satana, eererya wira etthu. Ela eri va. Nipotthe, nipotthe, oowaili anyu. Ti yeeyo. Murina nipotthe, owo orina nipotthe, nto xetwani uwo onookhuwela otthuna okhalihiriwa mmosa ni mukhw'awe. Masi Eroho Yowarya enookhuwela, nave. T'ani onrow'anyu omwaamini, Yeeyo? Vaareera. Nvenye voolilini vo, muhano. Nvenye vanrepani vo. Nvenye-vo, mwaamini. Murowe, mmwaamini Yoowo vano. Amen.

<sup>203</sup> Munnaamini? Sothene sinniweryaneya. Munnaamini? Ankhi nyuwo vamuthukumanoni?

<sup>204</sup> Nrowe nivenye neemele naanaano va. Naanaano va p'ukathi wo wira. Khula mutthu. . . Muluku ooreeriheni. Khula mutthu avenye eemele naanaano va. Mmuttotopele Muluku. Nvenxe matata.

<sup>205</sup> Kooxukhuru, Pwiya Yesu! Hiyo ninnoovuwihani Nyuwo mwaha w'eyuulupale Anyu, ni waavoniha Wanyu aretta. 

*ONAMOONA MPHAREYA* EMK64-0307

(A Testimony On The Sea)

Mutthak'ola wa Munna William Marrion Branham, opaceryawene olaleeriwe ni Enkelesi Esaapatu ohiyu, mahiku yeettaka 7 mweeri wa Março, 1964, Empa Soul's Harbor oDallas, Texas, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)